

# Sivik Edukesen Buk blong Tija

Ripablik blong Vanuatu




# Ol Seksen insaed long Buk ia

Introdaksen .....	02
Lesen 1: Demokrasi hemi wanem?.....	04
Lesen 2: Sitisensip hemi wanem? .....	13
Lesen 3: Wanem nao i mekem wan gudfala Sitisen?.....	18
Lesen 4: Olgeta Raet mo Responsibiliti insaed long wan Demokrasi.....	24
Lesen 5: Olgeta Human raet.....	28
Lesen 6: Sivil Sosaeti.....	36
Lesen 7: Media mo Sosol Media (misinformesen, Disinformesen) .....	40
Lesen 8: Sistem blong Gavman blong yumi long Vanuatu.....	47
Lesen 9: Wanem nao i mekem wan gudfala Lida?.....	55
Lesen 10: Olgeta Eleksen long Vanuatu.....	60
Lesen 11: Inkludum evriwan insaed long wan Demokrasi.....	72
Lesen 12: Fasin blong Vot.....	81
Lesen 13: Olgeta Eleksen Ofens mo Impotens blong Vot .....	89

## Ofis we i pablisim buk ia:

Vanuatu Elektrol Ofis mo Vanuatu Kurikulum Developmen Yunit.  
Wetem sapot blong Vanuatu Electoral Environment Project (VEEP)  
Pacific Ofis blong United Nations Development Programme (UNDP)  
©UNDP 2020 all rights reserved



# Fes Toktok Abaot Buk ia

Welkam long buk ia we hemi kam blong sapotem Sivik Edukesen Buklet we taetol blong hem hemi 'Vanuatu Blong yu'.

Olsem ol tija, yufala i mekem wan bigfala wok blong priperem ol jeneresen blong tumoro blong kam aktiv, gudfala sitisen. Long evri plan blong wok insaed long buk ia bambae yufala i faenemaot ol topik, tingting mo aktiviti we bae i help motivetem ol studen blong tingting, askem kwesten mo save moa abaot sitisensip, demokrasi mo olsem wanem kaontri i wok long Vanuatu.

## Stamba tingting blong kos ia

Kos ia i blong givim long ol studen save, skil, valiu we oli nidim blong kam ol risponsibol mo aktiv sitisen mo wok long sosaeti blong olgeta mo spesieli long olgeta eleksen proses.

## Tingting bihaen long kos ia

Wan helti demokrasi i nidim ol sitisen we oli komitim olgeta mo gat save blong mekem sua se i gat wan gudfala patisipesen long ol proses blong eleksen. Kos ia i givim ol besik sivik edukesen blong mekem sua se ol yangfala i karem save, gat ol skil mo ol valiu we i impoten long wan demokrasi we i wok gud.

Insaed long kos ia i gat ol seksen we i fokus long elektorol (o vota) edukesen blong help priperem ol yangfala blong tekpat fulwan long demokratik laef blong kaontri long wei blong eksesaesem raet blong olgeta blong vot long wan gudfala fasin. Infomesen abaot vot mo proses blong vot i stap tu insaed long ol tingting olsem link bitwin besik raet blong man o raet blong vot: rol, responsabiliti mo raet blong ol vota; rilesensip bitwin ol eleksen mo demokrasi mo ol kondisen we i nid blong i gat ol demokratik eleksen; from wanem nao wanwan vot i impoten.

## Wanem we kos i kavremap

Wael oli askem blong oli givim ol lesen folfolem nomo, kos i fleksibol wetem ij lesen blong wan topik. Oli save developem isi nomo wan lesen i go long plante lesen. Oli givim ol tingting blong ol eksesaes mo aktiviti blong ij lesen.

## Studen Wokbuk

Studen Wokbuk i kam wetem gaed ia wetem stamba tingting blong gaedem olgeta studen taem we oli stap lan mo givim ol eksesaes we oli save mekem long klas olsem wan grup blong wok o wok tugeta mo tu olsem wok blong mekem long haos. Bambae wanwan studen i mas gat wan empti notbuk blong yusum long taem blong mekem ol eksesaes long klas mo long haos.

Stamba tingting blong modul ia hemi blong givim long ol studen save, skil mo valiu we bae i helpem olgeta blong patisipet fulwan long sosaeti blong olgeta mo spesieli long eleksen proses.



## Asesmen blong lening

Ol lesen long kos ia i gat praktikol asesmen we bambae hemi givhan long tija blong jekem save blong studen. Wok blong jekem ol rikod blong studen long ol eksesaes/notbuk blong olgeta se i stret bambae hemi givim impoten infomesen mo helpem tija blong givim wan gudfala fidbak long ol studen. Olsem se ol pat blong lesen i alaoem plante aktiviti blong toktok mo kwesten, i impoten blong ol tija i tekem ol not long taem blong klas.

## Fasin blong wok

Kos ia i yusum plante difren aproj blong tij be wetem impotens long ol fasin blong patisipet. Fasin blong tij i inkludim wok blong koperet mo stretem ol problem, ol aktiviti blong lening blong ol smol grup, askem ol kwesten, studen i toktok wetem ol dibet mo diskasen, ol valiu klarifikesen mo ol praktikol ekesaes olsem ol pleplei. Oli disaenem ol aktiviti/wok blong lening blong:

1. Studen i no jusum nomo wanem blong lanem be olsem wanem mo from wanem oli intres long topik ia tu;
2. Testem abiliti blong yu;
3. Pulum intres;
4. Enkarenjem fasin blong stret problem;
5. Givim janis long ol studen blong toktok mo givimaot ol joes blong olgeta.

## Ol topik we i gat tumas toktok long hem mo i sensitiv

Olgeta tija i mas luksave se taem we oli tokbaot demokrasi, ol studen i save lukluk o bringimap ol topik we i no stret long olgeta o i gat tumas toktok long hem. Olgeta tija i nid blong priperem gud olgeta long hemia mo tekem se hemi ol taem blong tijim olgeta, mekem diskasen i flo mo mekem sua se oli presentem evri agumen. Hemi impoten blong tingbaot ol valiu blong demokrasi: abiliti, ikwaliti, daevesiti mo evriwan i fil fri blong toktok. Demokrasi i fasfas lelbet mo raorao i save kam antap. Bambae ol tija i nid blong enkarenjem moa toktok blong kamap wetem wan tingting. Hemi impoten se ol studen i gat wan sef envaeromen we oli save harem, rispektem mo akseptem evri tingting.





# Lesen 1: Demokrasi hemi wanem?

## Wanem we bae yu lanem afta long lesen ia:

Gat moa save long ol demokratik valiu, ol institusen mo ol proses, promotem ol demokratik fasin mo ol skil blong ol studen.

## Ol mein toktok/tingting:

Demokrasi, ol raet, ol fridom, ol sitisen

## Ol Tingting blong statem seksen ia:

Ol toktok blong Demokrasi  
Long tingting blong yu, wanem nao hemi Demokrasi?

## Preperesen:

Raetem bigwan 5 toktok blong demokrasi long 5 bigfala pis pepa (A3). Bae yu putum olgeta raon long klasrum.



## Fes toktok



Wan popula presiden blong United States of America, Abraham Lincoln, i eksplenem gud: "Wan demokrasi hemi wan Gavman blong pipol, tru long pipol mo blong ol pipol."

### Aktiviti: Raetem "Tokraon long toktok blong Abraham Lincoln" long bod.

Askem long eni studen blong eksplenem mining blong toktok ia long on toktok blong hem.

Eksplenem se toktok ia i minim se demokrasi i wan fom blong gavman we ol man we oli lidim oli ol pipol we pipol i elektem olgeta. Olgeta sitisen blong kaontri i elektem Gavman blong lidim kaontri mo gavman we oli elektem i wok from welfea blong pipol.

Askem ol studen blong raetem long eksesaes buk blong olgeta se toktok blong Abraham Lincoln i minim wanem long olgeta.

### Talem ol toktok ia:

Toktok ia demokrasi i kamaot long Greek long toktok ia demos ("pipol") mo kratos ("rul"). I minim se "Pipol i rul" mo hemi wan kaen gavman we pipol i gat otoriti blong jusum gavaning bodi blong olgeta.

Vanuatu hemi wan representativ demokrasi, pipol i elektem ol representativ blong deliberet mo disaed long wanem we oli kolem lejislesa, o mekem ol loa.

### Aktiviti blong stat wetem

Step 1: Putum ol faefala (5) pis pepa we yu bin priperem wetem ol faefala (5) toktok raon long klasrum. Yu save adem ol toktok we yu nomo yu jusum spesieli sipos i kam long wan man Vanuatu we ol man i save gud long hem.

Step 2: Askem ol studen blong pasem raon long klas mo ridim ol toktok ia. Askem long olgeta blong stanap andanit long wan toktok we oli laekem (o long wan we oli no laekem) o motivetem olgeta. Askem long olgeta blong tokbaot ol joes blong olgeta wetem ol narawan we oli jusum ol semak toktok.

Askem ol studen blong tokbaot hao nao oli gat motivesen ia. Invaetem olgeta blong ridimaot ol toktok we oli jusum mo askem olgeta blong talemaot on tingting blong olgeta mo givim ol komen long ol toktok mo mining blong olgeta.



## Ol toktok

“Demokrasi i minim: stik long ol rul blong kem iven taem we refri i no lukluk.”  
*Manfred Hausmann (Raeta blong Germani)*

“Mi luk demokrasi olsem wan samting we i givim long ol man we oli wik semak janis long olgeta we oli strong.”  
*Mahatma Gandhi (Lida blong India)*

“Demokrasi i bes long prinsipol ia se i gat ol ekstraodineri posibiliti long ol odineri pipol.”  
*Harry Emerson Fosdick (Pasta blong Amerika)*


“Gavman i yumi; yumi nao gavman, yu mo mi.”  
*Theodore Roosevelt (foma Presiden blong Amerika)*

“Long wan demokrasi, ofis we i hae moa hemi ofis blong ol sitisen.”  
*Jastis Felix Frankfurter, Suprim Kot USA*

## Vanuatu mo Demokrasi

Wan demokrasi hemi gavman tru long ol ripresentatif we oli elektem olgeta. Hemi wan kaen sosaeti we i sapotem semak raet, fridom blong toktok mo fea jajmen mo tekem tingting blong ol maenoriti. Wan demokrasi i enkarenjem tu wan helti Sivil Sosaeti wetem risponsibol mo aktiv sitisen we oli luksave sistem blong gavman mo wok wetem wan komon visen blong sivil laef.

Pipol i jusum ol ripresentatif blong olgeta tru long ol eleksen we i stap tekem ples. Hemia i taem we evri eligibol sitisen we ej blong olgeta i bitim 18 yia we i rejista blong save vot long taem blong eleksen.



Long Vanuatu, yumi elektem olgeta we i ripresentem yumi long Palemen.

- Long Vanuatu, olgeta memba blong Palemen i jusum Praem Minista.
- Gavman i ranem kaontri folem Konstitusen.
- Konstitusen i Suprim Loa o mama loa blong kaontri.

Konstitusen i lukluk long evri eria olsem demokrasi, olgeta institusen blong hem mo ol eleksen tu. Mama Loa i mekem se i gat ol fundamentol raet mo fridom, inkludim fridom blong toktok, blong go tugeta mo asosiesen mo tekpat long ol eleksen.

Plante gaeding prinsipol i akt olsem faondesem blong wan demokrasi olsem ekwaliti mo raet blong man, patisipesen blong sitisen mo save mekem politik. Wael pipol blong Vanuatu i gat ol raet mo fridom we i gat proteksen long olgeta, oli gat tu ol responsabiliti we i go tu wetem sitisensip.


### Olgeta prinsipol blong demokrasi:

- Sovereniti blong pipol;
- Stamba blong wan Gavman hemi agrimen blong ol pipol we i gavanem olgeta;
- Akaontabiliti mo transparensi blong gavman;
- Majoriti rul;
- Maenoriti raet;
- Kwarenti blong ol besik raet blong man;
- Fri mo fea eleksen;
- Semak long fored blong loa;
- Stretem folem loa;
- Ol limit we Mama loa i putum long gavman;
- Sosol, ekonomik mo politikol daevesiti;
- ol valiu blong abiliti, koperesen mo wanem we yumi save agri long hem.

## Aktiviti: Tri blong Demokrasi

### Preperesen:

Droem wan tri long blakbod (olsem tri we oli droem finis long Studen Wokbuk we i nogat toktok long hem – luk pitja long raet saed). Mekem sua se ol studen i karem ol buk blong olgeta blong wok we i klos i stap (blong mekem se oli no save luk “Tri blong Demokrasi” bifo grup i lukluk long hem).



### Step 1:

Askem long ol studen blong openem eksesaes buk blong olgeta mo droem tri long wan ful pej. Eksplenem long ol studen se bambae oli tingting long ol mein deskripsen blong wan demokratik kaontri.

Bifo oli mekem fes adisen long tri, tokbaot smol tri olsem wan samting we i laef, i stap gro, i strong be i save stap long denja sam taem. Sipos oli lukaotem gud bambae i gat sam benefit. Ol frut i dipen long ol narafala pat blong tri we oli wok tugeta. Tri i save sik be hemi save tu kam gud bageken. Tri wetem ol frut blong hem i nidim blong oli lukaotem gud olgeta oltaem.

### Step 2: Ol ruts blong tri.

Talem long ol studen se demokrasi i stap develop tru long sam valiu, prinsipol, institusen mo proses we i stap. Talem long olgeta se i gat 4 mein prinsipol we hemi stamba blong demokrasi. Hemia hemi 4 mein ruts blong tri.

1. **Pipol i kontrol** (Pipol i las otoriti mo sos blong otoriti blong gavman);
2. **Ikwaliti bitwin ol pipol** (bitwin ol sitisen taem we oli eksesaesem kontrol ia);
3. **Konstitusonol Gavman** (pipol i save limitim mo givim paoa long gavman tru long ol fundamentol loa inkludim Mama Loa);
4. **Fridom blong wan man** (Demokrasi i luksave impotens blong wan man mo blong evri man mo woman i gat sam fundamentol raet. Wan mein objektif blong demokrasi i blong protektem olgeta raet ia long wan praktikol wol blong evri dei laef).

Raetem ol toktok long bold long ol fofala (4) ruts blong tri mo eksplenem wanwan long olgeta. Afta askem long ol studen blong raetem ol toktok ia long ol ruts blong tri blong olgeta insaed long ol eksesaes buk blong olgeta.



### Step 3: Stamba blong tri:

#### Talem ol toktok ia:

I gat wan demokratik institusen (stamba blong tri blong yumi ia) blong givim long yumi wan tri we i strong inaf blong holem ol branj mo frut be i save fesem ol strong win olsem ol sosol jens ect.. Olgeta institusen i fomem medel blong strakja we i sapotem pat blong tri we yumi luk mo mekem se i gro i go antap, gro bigwan mo givim frut. Hemia i pat blong ful stamba blong tri.

Raetem wanwan long o long saed blong stamba blong tri long drowing. Ol mein demokratik institusen hemi:

- Ol eleksen
- Konstitusen
- Palemen
- Jastis sistem
- Sivil Sosaeti (sosol muvmen mo grup we oli intres)
- Ol politikal pati
- Media, raet long infomesen & sivik edukenes
- Lokol gavman
- Eksekutif mo pablik administresen

### Step 4: Ol frut blong tri


Ol stamba benefit blong demokrasi hemi:

- Pis
- Prosperiti
- No pua tumas
- Nogat tumas vaelens
- Ol komuniti we i moa aktif
- Digniti blong evri pipol
- Ol pipol mo ol sosaeti i kasem ful potensol blong olgeta.
- Impruvum kwaliti blong laef
- Fridom

Askem ol studen blong raetem hemia long ol frut blong tri mo putum tu ol narawan sipos oli kamap wetem ol stret proposal.

### Step 5:

Taem we hemia i stret, ridimaot mo tokbaot ol benefit we oli givim bageken. Rimaenem ol studen se ol institusen i mas wok long wan fasin we i fea (demokratik) – long fasin blong rispektem olgeta prinsipol we oli putum ia – blong mekem se tri blong demokrasi ia i putum frut – olgeta benefit we yumi evriwan i wantem.



## Aktiviti:

### Ol Kwesten: Wanem we i demokratik o i no demokratik?

Ridimaot wan list blong ol stetmen mo askem ol studen blong traem talem sipos stetmen ia i ripresentem wan demokratik stet o aksen o nogat mo risen from wanem. Stetmen i save inkludim olgeta ia:

- Wan dikteta i rulum wan kaontri we i nogat eleksen;
- Oli rikodem mo mekem ripot blong ol sesen blong Palemen;
- Wan smol kaljurol grup i no alao blong go long sam ples blong Kapitol Siti;
- Polis i disaed long ol panisman blong ol man we i brekem loa;
- I nogat konstitusen long wan kaontri;
- I nogat inaf wota o kakae long wan komuniti;
- Ol woman i no alao blong vot long ol eleksen;
- Salari blong ol woman hemi 20% daon long salari blong ol man long semak wok.

## Las toktok:

Askem ol studen blong fomem ol grup blong tu (2) mo talem from wanem oli ting se Vanuatu i wan demokrasi.

Tokbaot hemia olsem wan klas, raetem ol ansa long bod. Afta askem ol studen blong raetem wan joen klas stetmen; "Yumi talem se Vanuatu i wan demokratik kaontri from hemi gat ol valiu, ol sistem mo ol karakteristik ia..."

Askem long ol studen blong raetem stetmen we oli faenalaesem insaed long eksesaes buk blong olgeta.



# Lesen 2: Sitisensip hemi wanem?



## Wanem we bae yu lanem afta long lesen ia:

Gat moa save long sitisensip mo long ol implikesen blong hem, lukluk moa long tingting blong "aedentiti", impotens blong Nasonal Aedentiti Kad.

## Ol mein toktok/tingting:

Aedentiti, sitisensip mo Nasonal Aedentiti Kad

## Ol Tingting blong statem seksen ia:

Mekem wan klas i tokbaot tingting blong ol studen abaot aedentiti.

Divaedem klas long ol smolsmol grup mo askem tingting blong olgeta, yumi olsem man Vanuatu, wanem nao i minim long olgeta. Raetem daon tingting blong olgeta long bod, tikim ol tingting we oli riptim blong mekem se oli haelaetem ol semak o jenerol tingting. Tokbaot ol toktok we i semak mo i difrens bitwin ol tingting. Tokbaot tugeta: Wea nao ol tingting blong yumi olsem man Vanuatu i save kam from?





## Aktiviti: Aedentiti

Mekem wan sot diskasen abaot aedentiti – putum tugeta aedentiti blong wanwan man wetem nasonal aedentiti.

Askem ol studen: Wanem nao aedentiti blong yu?

Raetem long fored “Aedentiti blong wan man i talem se man ia hemi hu ia mo wanem i mekem se hem i man olsem.”

### Talem ol toktok ia:

Wan man i gat individuol aedentiti blong hem mo aedentiti i bes long grup o komuniti we oli kamaot long hem. Sam pat blong aedentiti blong wan man i stap semak nomo mo hemi jusum narawan. Aedentiti i save stap tu olsem ol karakteristik, tradisen mo bilif blong wan man o grup blong talem aot olgeta se oli stap semak nomo o difren long ol narafala man o grup.

Olsem wan klasrum, kamap wetem wan list blong wanem kaen samting nao i talem aot aedentiti blong wan man. Rikodem olgeta tingting ia o kategori ia long fored. Olgeta eksampol i save inkludim:

1. Jej/ spirituol afliesen;
2. Kalja, ples we yu kam from, komuniti;
3. Apierens/stael;
4. Langwis/kaontri;
5. Pasem taem/intres;
6. Jenda;
7. Bilif mo valiu;
8. Grup/ oganaesesen/ komuniti membasip;
9. Fasin blong man.

### Talem ol toktok ia:

Ol kaontri tu oli gat ol aedentiti semak long wanwan man.

Askem ol studen blong leftemap han blong olgeta mo tokbaot ol kwesten ia:

- Wanem nao i mekem Ni-Vanuatu nasonal aedentiti?
- Wanem nao i minim yu olsem wan man Vanuatu?
- Wea nao wan nasonal aedentiti i kam from?
- Hao nao ol man wetem plante difren aedentiti i save kam tugeta blong fomem wan nasonal aedentiti?



## Sitisensip

Askem ol studen se long tingting blong olgeta wanem nao mining blong “sitisensip”. Helpem olgeta blong putum difrens bitwin aedentiti mo sitisensip.

### Talem ol toktok ia:

Sitisensip i stetes blong wan man o woman we oli luksave hem olsem wan ligol memba blong wan nasen. Sitisensip i wan rilesensip bitwin wan man mo wan kaontri we man ia i dipen long hem mo blong mekem se hemi entaetol long proteksen blong hem. Wanwan kaontri i putum ol kondisen we bae hemi luksave ol man o woman olsem ol sitisen blong hem.

Long Vanuatu, ol loa we i gavanem sitisensip i kamaot long Konstitusen o Sitisensip Akt. Evri man o woman we i gat ol bubu blong olgeta blong Vanuatu long Indipendens dei long 1980, oli tekem olgeta olsem wan sitisen blong Vanuatu. Long olgeta we i wantem kam wan sitisen blong Vanuatu, i gat difren kaen blong sitisensip mo eligibiliti.

### Ridim mo eksplenem wanwan long ol kraeteria andanit ia:

#### 1. Sitisensip

Wan man o woman nara kaontri we ej blong hem i bitim 18 yia mo wetem ful kapasiti blong hem o i nogat wan kaontri i rikonaesem hem i save aplae blong kam sitisen olsem wan sitisen blong Vanuatu sipos hemi kontiniu blong liv 10 yia stret bifo deit blong aplikesen.

#### 2. Sitisensip tru long Maret

Wan man o woman we i no sitisen mo i maretem wan sitisen blong Vanuatu i save aplae from sitisensip sipos i liv wetem man o woman blong hem long Vanuatu bitim 2 yia.

#### 3. Karem bak sitisensip

Wan man o woman we i leko o lusum sitisensip blong Vanuatu i save aplae bageken blong karem bak sitisensip blong hem.

#### 4. Entaetolmen long Sitisensip

Evri man o woman we long Dei blong Indipendens long 30 Julae 1980 oli ol man o woman we ol bubu blong olgeta oli blong Vanuatu mo oli gat nasonaliti mo sitisensip blong wan nara kaontri o stetes blong man o woman we i save jusum (i minim wan man o woman we i jusum blong) i save kam wan sitisen blong Vanuatu sipos i mekem wan aplikesen o ol parens mo wan man o woman we i lukluk long hem anda long loa, i mekem wan aplikesen long bihaf blong hem.



## Investa Sitisensip

I gat tri (3) difren sab-kategori we i stap naoia anda long Sitisensip Akt we i detemaenem wanem we oli kolek Sitisensip Invesmen Program. Hemia i minim se wan man o woman blong wan nara kaontri i save karem sitisensip blong Vanuatu sipos i investem wan amaon blong mani long kaontri.

Nomata ol man i save karem sitisensip unda long ol difren program, ol investa i nogat raet blong mekem politiks iven oli duol sitisen. Ol duol sitisen i no save vot, kontest mo wok long wan pablik ofis be sipos nomo oli manples mo naturalaes sitisen.

## Nasonal Aedentiti Kad

### Talem ol toktok ia:

Gavman i introdusim i no longtaem wan nasonal aedentiti kad blong evri Ni-Vanuatu sitisen. Hemia i wan impoten step tumas from se kad ia i soem pruf se yu wan Ni-Vanuatu sitisen.

Evriwan i gat raet blong oli luksave hem olsem wan man anda long loa. Evriwan i gat raet long ligol aedentiti. Hemia i pat long wan intenasonal agrimen blong Unaeted Nasen we oli kolek Yunivesol Dikleresen long Raet blong man. Bambaie yumi lukluk moa long Dikleresen ia mo olgeta prinsipol blong hem long Lesen 5.

Atikol 6 long dikleresen i talem se:

“Evriwan i gat raet blong oli luksave olgeta long weaples hemi stap long hem, olsem ol wan man o woman, bifo long loa.”

Taem we yu gat wan pepa we i pruvum aedentiti blong wan man o woman i impoten blong eni sitisen i save gat raet, benefit mo sevis. Tedei, taem we yu gat wan ligol aedentiti i impoten tumas long eni man o woman we i wantem toktok wetem ol otoriti, mekem bisnis, travel mo aplae from ol gavman benefit.

Aedentiti i pleim wan impoten rol blong alaoem ol man blong eksesaesem ol raet mo responsabiliti blong olgeta long wan fasin we i semak mo i stret long sosaeti blong tedei.

ID kad i ripresentem yu, i mekem se yu yu wan nomo, i soemaot wanem yu gat.

Hemi no ripresentem yumi wanwan, hemi ripresentem yumi evriwan olsem wan kaontri. Hemi tekem yumi i kam tugeta blong fomem wan kaontri we i gud moa.



## Raet long bod

### A. Impotens blong ligol aedentiti:

- Ol otoriti I luksave yu olsem wan sitisen;
- olgeta raet mo responsabiliti olsem wan sitisen;
- gat akses long ol sevis blong gavman;
- gat raet mo kapasiti blong vot;
- travel/gat wan paspot;
- help blong mekem ol ofisol wok wetem administresen.

### B. Nasonal ID Kad hemi wanem?

Soem wan eksampol blong wan tru Nasonal ID Kad, pasem long evriwan insaed long klas.

#### Talem ol toktok ia:

ID kad hemi wan nomo we i blong yu mo yu wan nomo.

Insaed long ID Kad i gat:

- foto blong yu;
- fameli nem, nem;
- deit we yu bon long hem;
- ples we yu stap long hem;
- deit we kad i expae;
- wan namba nomo;
- kad i gat tu wan smol pis we i gat insaed evri infomesen blong yusum mo jekem ol infomesen isi nomo.

### C. Ol benefit blong ID Kad:

Wanem nao yu save mekem wetem kad:

- karem helt sevis;
- ol mama i save tekem ol bebi blong olgeta i go blong karem tritmen;
- karem help long gavman/ emejensi/ rilif/ asistens;
- mekem sua se ol pikinini i gat ples long skul;
- save gat akses long ol emejensi disasta rilif;
- vot taem ej blong yu i bitim 18 yia mo yu rejista;
- openem wan bank akaon taem we ej blong yu i bitim 18 yia;
- transferem mani;
- risivim mani;
- aksesem ol sevis blong gavman;
- travel;
- gat wan trak.

#### Talem ol toktok ia:

Evri Ni-Vanuatu i shud gat wan Nasonal ID Kad. Yu gat wan? Askem long studen blong leftemap han blong olgeta sipos oli gat. Ol parens blong yufala oli gat wan?

Sipos yu o parens blong yu i nogat kad, askem olgeta blong aplae from wan. Olgeta sitisen i save karem wan Nasonal ID Kad eni taem long wan yia. Long Port Vila, yu save go long Sivil Rejistri mo Vital Statistik Dipatmen (Sivil Rejistri) long Ministri blong Intenal Afea. Hedkota blong wanwan provins i gat wan Sivil Rejistri Ofis we i save isium tu olgeta Nasonal ID Kad.

### Aktiviti: Sitisensip mo Aedentiti

Askem ol studen blong yusum toktok 'sitisensip' mo 'aedentiti' long wan sentens mo raetem long eksesaes buk blong olgeta. Askem ol studen hu i wantem ridim sentens blong hem.





# Lesen 3: Wanem nao i mekem se yu wan gudfala sitisen?

## Wanem we bae yu lanem afta long lesen ia:

Mekem se oli save moa abaot sitisensip mo ol implikesen blong hem, wanem nao i mekem blong yu kam wan gudfala sitisen mo enkarenjem ol studen we oli wantem blong kam gud mo moa aktiv sitisen.

## Ol mein toktok/tingting:

Sitisensip mo gudfala sitisen

## Ol Tingting blong statem seksen ia:

Smol grup mo putum ol tingting tugeta



## Aktiviti blong Stat wetem: Wanem nao i mekem se yu wan gudfala sitisen - putum ol tingting tugeta

Mek sua ol wokbuk blong studen i clos olsem ia oli no save lukluk pikja "Olsem wanem blong yu kam wan gudfala sitisen".

### Olsem wanem blong yu kam wan gudfala sitisen:

1. Voluntia insaed long komuniti blong yu
2. Yu mas hones mo man i save trastem yu
3. Folem ol rul mo loa
4. Rispektem ol raet blong ol narafala man
5. Save long ol samting we i stap hapen raon long yu
6. Rispektem propeti blong ol narafala man
7. Lukaot long ol narafala man
8. Tekem responsibiliti blong ol aksen blong yu
9. Yu wan gudfala neiba
10. Protektem envaeronmen
11. Rispektem ol nasonal simbol, flag mo nasonal antem
12. Givim blad / plasma spos i nid
13. Vot



### Step 1:

Putum ol tingting tugeta. Askem ol studen: Wanem nao sam long ol kwaliti blong wan gudfala sitisen? Raetem daon evri samting ia long bod. Yu save givim sam tingting (luk long list antap) o mekem ol studen i tingting long ol difren fasin blong tokbaot sitisensip (long saed blong ol raet mo responsabiliti mo long evri level mo wok long laef).



## Step 2:

Talem long ol studen blong lukluk long list: Askem: yu luk eni jenerol toktok o tingting? (bae i gat plante aetem abaot raet blong ol pipol mo responsabiliti blong olgeta).

## Step 3:

Askem studen blong sidaon long ol grup blong 4.

### Talem ol toktok ia:

Naoia we yumi listim plante aspek blong wan gudfala sitisen, bae yumi wok long grup blong 4 mo putum daon ol top 10 kwaliti blong wan gudfala sitisen.

## Step 4:

Mekem evri grup i serem ol ansa blong olgeta. Stat blong listim ol top 10 kwaliti olsem we fes grup i bin agri long hem. Afta muv i go long seken grup. Sipos grup ia i kamap wetem wan niu kwaliti, ademap long list. Sipos oli riptim wan kwaliti, putum wan tik kolosap long hemia long fes list. Kohed blong mekem hemia kasem taem we evri kwaliti we evri grup i inkludim i go insaed long list. Wetem list we oli putum tugeta ia, helpem ol studen blong aedentifaem ol top 10 popula kwaliti.

### Dibrif - Askem ol studen:

Wanem nao i had blong mekem list ia? From wanem?  
Yu ting se samting i impoten semak?



## Step 5:

Askem ol studen blong raetem daon long ol ekseaes buk blong olgeta ol on pesonol rang blong ol 3 kwaliti blong wan gudfala sitisen folem oda blong "impoten moa" kasem "no impoten tumas."

Yusum list we oli putum tugeta ia long pej 15 insaed long buk blong wok blong studen.

# Mekem wok blong voluntia

Askem klas sipos wan i stap mekem wok blong voluntia? Invaetem olgeta blong tokbaot wanem oli stap mekem.

### Talem ol toktok ia:

Wok blong voluntia i no minim nomo wok blong wan oganaesesen, i save minim tu tekem ol pesonol inisietiv olsem askem blong mekem shopping blong wan neiba we i sik. Kam wan gudfala sitisen i save tru long ol smolsmol asken.

Askem ol studen blong serem ol stori blong olgeta.

Talem from wanem i impoten blong mekem wok blong voluntia/gihvan/helpem olgeta we oli nogat tumas mani.

## Aktiviti: Raet abaot wan gudfala sitisen

Askem long ol studen blong sidaon kwaet mo raetem kasem 400 wods long topik:

**"From wanem i impoten blong kam wan gudfala sitisen?"**

Givim long ol studen 20 kasem 30 minit. Afta wetem taem we i stap, askem long sam long ol studen blong ridimaot wok blong olgeta. Invaetem ol komen long klas long en blong wanwan wok.





# Lesen 4: Olgeta Raet mo Responsibiliti insaed long wan Demokrasi

## Wanem we bae yu lanem afta long lesen ia:

Gat moa save long ol raet mo ol responsabiliti; enkarenjem ol studen blong impruvum demokratik fasin mo save moa long ol sivik responsabiliti blong olgeta.

## Ol mein toktok/tingting:

Olgeta Raet mo responsabiliti, fridom

## Ol Tingting blong statem seksen ia:

Matjem ol raet wetem ol definisen blong olgeta



# Olgeta Raet mo Responsabiliti



## Preperesen :

Rifea long ilustresen blong "Olgeta Raet mo Responsabiliti" daon ia mo priperem aktiviti. Raetemaot wanwan long ol 12 raet mo wanwan long ol 12 responsibiliti long ilustresen daon ia long ol pis pepa. Bae yu yusum ol 24 pis pepa ia blong mekem aktiviti we i stap daon ia.

## Talem ol toktok ia:

Taem we demokrasi i givim ol raet – entaetolmen mo fridom – i karem i kam tu olgeta ripsabiliti we i kam wetem. Olsem eksampol, sipos ol sitisen i ekspektem raet blong gat wan gudfala standet blong laef, oli mas pem ol fi blong gavman blong gat wan gudfala standet blong laef. Sipos ol sitisen i wantem wan klin envaeromen, oli no mas sakem ol toti long rod o long envaeromen raon long yumi mo save volentia olsem eksampol blong klinim sanbij.

Raetem wanwan long ol raet andanit ia long blakbod.

- Fridom blong muvmen;
- Fridom blong spij;
- Raet long praevet laef;
- Fridom blong tingting, prisinpol mo jej;
- Fridom blong go tugeta;
- Fridom from fasin blong slav;
- Raet blong vot.

Ridim wan afta wan mo blong wanwan long olgeta, askem long studen blong leftemap han blong olgeta mo traem talem wanwan long olgeta i minim wanem. Gaedem olgeta tru long ol ansa blong olgeta, lisen long ol mining blong toktok blong moa long wan studen long wan taem. Afta long en blong ij topik, samaraesem afta we yu ridim stret ansa ia:

**1. Fridom blong muvmen:**

Yu gat raet blong muv fri long wan kaontri i go long wan narafala kaontri mo tu insaed long ol kaontri.

**2. Fridom blong toktok:**

Yu gat raet blong talem tingting blong yu mo bae i no gat wan man i stopem o panisim yu.

**3. Raet long praevesi:**

Yu gat raet blong liv long praevet mo kipim ol pesonal laef-stael we yu jusum oli praevet, insaed long hom blong yu.

**4. Fridom blong tingting, bilif mo relijen:**

Yu gat raet blong fomem ol tingting blong yu, talem tingting blong yu, tingting long yuwan, mo jusum filosofi mo relijen blong yu.

**5. Fridom blong go tugeta (o fomem asosiesen):**

Yu gat raet blong tekpat long wan pablik demonstresen (maj o straek) be no mas putum laef blong man long risk o spolem propeti.

**6. Fridom long slevri:**

Man i no save mekem yu fraet o panisim yu blong fosem yu blong wok (mo sipos yu wantem mekem o no).

**7. Raet blong vot:**

Yu gat raet blong tekpat long demokrasi blong yumi tru long fasin blong jusum ol representativ blon gyu tru long ol eleksen. Long Vanuatu, yu save vot taem yu gat 18 yia mo yu mas rejista blong stap long elektrol roll.

**Aktiviti: Olgeta Raet mo Responsibiliti insaed long wan Demokrasi**

**Talem ol toktok ia:**

Evri raet i gat responsabiliti. Wan responsabiliti i wan wok o wan obligesen. Hemi wan samting we yu mas mekem blong mekem se yu rispektem, promotem mo mentenem sam raet. Eksampol, raet blong vot i wan risponsabiliti blong vot long wan fasin we i klia mo wetem wan strong tingting.


Yu gat 24 pis pepa we yu bin priperem (12 raet, 12 responsabiliti). Miksim olgeta long wan boks. Folem namba blong ol studen long klas blong yu, givim wan pis pepa long ij studen o tu tu (2) studen o wan grup blong 3 o moa.

Askem long fes studen o grup blong ridimaot wanem i stap long pepa blong olgeta. I save wan raet o wan responsabiliti. Askem ol narawan blong lukluk long pepa blong olgeta mo faenemaot stret raet/ responsabiliti. Askem long studen/grup wetem stret pepa blong go mo sidaon tugeta. Mekem hemia kasem taem we evri raet mo responsabiliti i go semak.

Afta givim long ol grup blong 2/grup we i bitim 2, 15 minit blong toktok wetem wanwan long olgeta, wanem nao olgeta raet/ responsabiliti ia mo wanem nao i mekem long laef blong olgeta. Pas raon long ol grup mo kohed blong toktok wetem olgeta sipos i nid.

Afta long 15 minit, askem long wanwan studen/grup blong talemaot long klas wanem oli ting se i impoten abaot raet mo responsabiliti ia mo olsem wanem i konsenem laef blong olgeta. Askem long olgeta blong givim ol tru laef eksampol mo soem olsem wanem i afektem laef blong olgeta.

**Droits et responsabilités dans une démocratie**





# Lesen 5: Olgeta HumanRaet

## Wanem we bae yu lanem afta long lesen ia:

Gat moa save long raet blong man mo olsem wanem oli linkim wetem demokrasi.

## Ol mein toktok/tingting:

Ol raet, Univesol Dekleresen Blong Ol Human Raet

## Ol Tingting blong statem seksen ia:

Wanem we yu save finis



## Aktiviti blong Stat wetem: Tru o I no tru

Askem long ol studen blong openem ol ekseaes buk blong olgeta mo raetem namba 1 kasem 5 long sem laen. Afta askem long olgeta blong openem studen wokbuk blong olgeta mo ridim slo nomo toktok namba 1 kasem namba 5. Talem long olgeta blong tinktink long ij toktok ia mo putum "tru" o "I no tru" folem ij namba. Afta diskasem wanem we oli faenemaot wetem klas.

Ol Human Raet hemi:

1. Olgeta entaetolmen ia we wan man i gat from se hem hemi human (raet long laef, edukesen, kakae, ruf ova long hed, etc). Human raet hemi no wan samting we man i pem, i winim o oli pasem long hem; ol samting ia oli blong pipol from nomo se oli human. (Tru)
2. Ol raet we oli naturol mo God i givim. (I no tru)
3. Ol besik standed we pipol bae no save liv gud wetaot olgeta standed ia. (Tru)
4. Ol raet we bae oli no save tekemaot long olgeta; no gat man i gat raet blong karemaot ol raet blong wan man blong eni risen we hemi gat. Ol pipol oli stil gat ol human raet nomata sipos ol loa blong kaontri blong olgeta i no rikonaesem olgeta, o sipos oli no rispektem ol raet blong olgeta - eksampol, long taem blong slevri, ol slev oli stil gat ol raet nomata se oli no rispektem ol raet blong olgeta. (Tru)
5. Oli semak long ol raet blong evri human being nomata long kala blong skin, sipos oli man o woman, wanem relijen, politikol o narafala lukluk, nasonal o sosol orijin. Yumi evriwan yumi bon fri, mo ikwol long digniti mo ol raet - human raet hemi kavremap evri man raon long wol. (Tru)

## Aktiviti: Wanem nao yu save finis?

Raetem ol kwesten ia long bod:

1. Wanem nao ol raet blong man?
2. Hu ia i gat raet blong man?
3. Hua ia i responsibol blong protektem olgeta?
4. Hao nao oli save protektem olgeta?
5. Wanem raet ia yumi gat olsem ol sitisen blong Vanuatu?

Serem klas long 5 grup mo givim wan kwesten long ij grup. Askem long olgeta blong kamap wetem ol ansa blong ol kwesten blong olgeta long 15 minits. Askem ij grup blong prisentem long klas wanem we oli faenem mo raetem daon ol mein poen long bod.

## Talem ol toktok ia:

Ol raet blong man hemi ol raet we yumi olsem human bing yumi gat. Ol raet ia i blong yumi evriwan nomata se yumi hu o yumi liv wea mo oli no save karemaot long yumi. Hemi ol samting we yumi nidim blong helpem yumi blong prosipa mo tekpat fulwan long sosaeti mo oli protektem digniti blong evri man.



Eksplenem se raet blong man i stap olsem ol raet blong gat ol gudfala samting mo tu olsem ol raet blong kam fri from ol samting we i nogud. Olsem eksampol:

### **Olgeta raet blong gat samting (ol raet we i gud):**

- Gat raet long helt;
- Gat raet long eduksen.

### **Olgeta raet blong kam fri from ol samting (samting we i no nogud):**

- Gat raet blong fri from slaveri;
- Gat raet blong fri from diskriminesen.

Askem long ol studen se long tingting blong olgeta wanem nao ol fundamentol valiu blong raet blong man, alaoem olgeta blong givim ol tingting long grup, eksampol: ekwaliti, rispek, fridom, digniti mo jastis.

Eksplenem se plante long ol valiu we i sapotem ol raet blong man i ol impoten valiu long demokrasi blong Vanuatu. Morol mo etik valiu i detemaenem wanem pipol i tink se i raet mo i rong mo hemia i stap insaed long loa. Long wan demokrasi, ol sitisen i save putum presa long gavman blong jenisim o mekem ol loa blong riflektem ol valiu long sosaeti.

## **Univesol Dekleresen Blong Ol Human Raet**

### **Talem ol toktok ia:**

*Univesol Dekleresen Blong Ol Human Raet* i protektem fundamentol raet blong yumi mo i impoten blong save wanem raet ia yumi tokbaot ia.

### **Samaraesem histri blong Univesol Dekleresen Blong Ol Human Raet (UDHR) long ol studen:**

Tingting we pipol i gat ol besik raet (olsem raet long laef) i stap long plante yia finis. Bifo, ol kriminol loa i protektem plante olgeta raet ia. Olsem eksampol, kilim ded man i olsem wan kraem long plante sosaeti from se i karemaot propeti blong man witaot wan gud risen (stil). Sam kaontri i listim ol raet blong ol sitisen mo oltaem oli inkludim insaed long konstitusen blong olgeta blong mekem sua se oli protektem olgeta.

Histri blong Yunivesol Dekleresen blong raet blong ol man i go bak kasem taem we Unaeted Nasen i fom long 1945. Long taem blong wol wo tu (1939 – 1945) i bin gat plante fasin we i no stret i bin tekem ples we i mekem se proteksen long raet blong ol man i kam wan intenasonal praeoriti. Long taem blong faet ia, Nazi we hemi pati we i rul long Germani i bin tritim nogud plante man inkludim ol Jews, pipol wetem disabiliti mo ol nara grup. Oli karem ol ting blong olgeta mo oli kilim ded miliens pipol long ol konsentresen kamp we ol Nazi i setemap.

Afta long faet, wan niu bodi i fom blong mekem sua se ol kaen fasin olsem i nomo hapen bageken mo wok blong hem hemi blong mentenem pis mo sekuriti long wol. Bodi ia hemi Unaeted Nasen (UN). Hemi tekem tugeta ol ripresentativ blong evri kaontri long wol mo hed ofis blong hem i stap long New York.

UN i traem blong putum long wan dokumen we oli kolek Yunivesol Dekleresen blong Raet blong Man (UDRM) olgeta fundamentol raet mo fridom we evri man i serem long intenasonal level. Oli raetem dokumen ia long 1948 mo oli askem long evri kaontri blong agri long ol raet we oli putum insaed long dokumen ia. Yunivesol Dekleresen blong Raet blong Man i luksave digniti blong evri pipol mo talem se ol raet blong man i shud aplae semak long evriwan nomata yu yu hu o weaples yu liv.

Insaed long dokumen ia i gat 30 Atikol we hemi besis blong proteksen mo promosen blong raet blong man raon long wol. Hemi inkludim sivil mo politikol raet, olsem raet blong laef, fri spij, toktok mo praevet laef. Hemi inkludim tu ekonomik, sosol, mo kaljurol raet olsem raet blong sosol sekuriti, helt mo eduksen. Evri kaontri i bin endosem ol raet ia mo plante kaontri i putum insaed long ol loa o konstitusen blong olgeta.

Sam taem afta, oli adem ol niu raet long list blong ol raet blong UDRM mo tu (2) niu dokumen i kamaot. I gat Intenasonal Kovenent long Ekonomik, Sosol mo Kaljurol Raet (olsem raet blong folem on kalja blong yu mo blong disaed weaples yu wantem liv long hem); mo Intenasonal Kovenent long Sivil mo Politikol Raet (olsem raet blong gat wan fea jajmen mo raet blong vot). Oli askem long ol kaontri blong saenem ol dokumen ia blong talem se oli agri long olgeta mo bambae oli protektem ol raet we oli putum insaed long ol dokumen ia.

Antap long hemi ia, hemia hemi Konvensen long Eliminisen blong Eni Kaen Fom blong Diskriminesen Akensem ol Woman ( CEDAW). Hemi wan intenasonal triti we Jenerol Asembli blong Unaeted Nasen i adoptem long 1979. Olsem we oli diskraebem olsem wan intenasonal Bil blong Raet blong ol woman, oli bin introdusim long 1981 mo 189 kaontri i raetifaem (agri) long hem.



## Aktiviti: From wanem ol human raet oli impoten

Askem long ol studen blong diskasem from wanem raet blong man i impoten. Ol ansa i save inkludim:

- Human Raet i impoten blong pipol i liv olsem we oli wantem mo gat wan laef we oli satisfae long hem;
- Human Raet i impoten blong mekem sua se pipol i gat semak mo fea tritmen;
- Human Raet i luksave valiu mo digniti blong evri man;
- Human Raet i luksave impotens blong mutuol rispek bitwin ol pipol mo i helpem yumi blong liv tugeta blong yumi save helpem yumi wanwan.

**“Tritim ol narawan long semak fasin we yu wantem olgeta oli tritim yu.”**

**Tokbaot / putum tugeta ol tingting wetem ol studen blong givim mining blong stetmen ia.**



Eksplenem se wan long ol mein fundamentol valiu blong raet blong man hemi bigfala toktok ia se yu shud: “tritim ol narawan olsem we yu wantem se oli tritim yu.” Toktok ia hemi “Golden Rul.” Hemi wan tingting we oli stap ripitim bifo finis i kam long plante difren kalja mo jej.

**Askem ol studen: Jej blong yu i gat ol valiu ia? Hao nao oli stap givim?**

Taem we yumi stap talem se wanwan man i gat ol raet blong hem, yumi stap talem tu se wanwan man i gat ol responsabiliti blong rispektem ol raet blong nara man. Ol raet mo responsabiliti blong ol sitisen i semak. Sipos yumi evriwan i gat raet blong oli rispektem yumi, so hemi minim se yumi gat wan klia obligesen blong mas rispektem yumi wanwan. Sipos yumi evriwan i gat raet blong talem wan samting long wan isu we i afektem laef blong yumi so yumi gat wan responsabiliti blong lisen long ol tingting blong ol narawan long ol isu we i afektem olgeta tu.

## Ol kategori blong olgeta raet

### Talem ol toktok ia:

I gat tri (3) kategori blong olgeta Raet.

**Raetem ol kategori ia long bold long blakbod.**

### 1. Ol sivil mo politikal raet

Hemia hemi olgeta we oli lukluk i go long saed blong fridom mo i inkludim ol raet blong laef, fridom mo sekuriti blong wanwan man; fridom from safaring mo slav; tekpat long politik; fridom blong givim vii, toktok, tingting, bilif mo jej; fridom blong asosiesen mo go tugeta.

### 2. Ol raet long saed blong ekonomi mo sosol

Hemia hemi ol raet long saed blong sekuriti olsem eksampol ol raet blong wok; edukesen; wan gudfala standet blong living, kakae, haos mo helt.

### 3. Ol raet long saed blong envaeromen, kalja mo developmen

Hemia i inkludim raet blong laef long wan envaeromen we i klin mo oli no spoelem ol ting mo raet long kaljurol, politikal mo ekonomik developmen.

### Homwok

**Askem ol studen blong jusum wan long ol trifala kategori ia mo raetem wan sot toktok long wanem i minim long olgeta mo olsem wanem i aplae long Vanuatu.**



# Univesol Dekleresen Blong Ol Human Raet

## 1 Yumi evriwan yumi bon fri mo semak

Yumi evriwan yumi bon fri. Yumi evriwan i gat ol tingting blong yumiwan. Yumi shud kasem semak tritmen.

## 2 No tritim nogud narafala man

Ol raet ia hemi blong evriwan, nomata long ol difrens blong yumi.

## 3 Raet long laef

Yumi evriwan i gat raet long laef, mo blong liv long fridom mo sefti.

## 4 No Slevri

No gat man i gat raet blong mekem yumi kam wan slev. Mo yumi no save mekem eniwan i kam wan slev.

## 5 No mekem man i safa

No gat man i gat raet blong mekem yumi harem nogud o mekem yumi safa.

## 6 Yu gat ol raet nomata long ples we yu go long hem

Mi mi wan man olsem yu nomol

## 7 Yumi Evriwan i Ikwol Bifo long Loa

Loa i semak blong evriwan. Hemi mas tritim yumi evriwan long wan fasin we i fea.

## 8 Loa i protektem ol Human Raet blong yu

Yumi evriwan i save askem loa blong givhan long yumi taem wan man i no tritim yumi long wan wei we i fea.

## 9 Holem taet wan man long wan wei we i no stret

No gat man i gat raet blong putum yumi long kalabus wetaot gud risen mo holem taet yumi long ples ia, o sendem yumi aot long kaontri blong yumi.

## 10 Raet long Trael

Sipos we oli putum yu long trael, hemia i shud stap long pablik. Olgeta we oli traelem yumi oli shud no letem eniwan i talem wanem blong mekem long olgeta.

## 11 Yumi inosen olwe kasem taem oli pruvum se yumi gilti

Yumi no shud blemem eniwan from wan samting kasem taem we i gat pruf blong hem. Taem pipol i se yumi mekem wan rabis samting, yumi gat raet blong soem se hemi no tru.

## 12 Raet long Praevesi

No gat man i shud traem blong spolem gudfala nem blong yumi. No gat man i gat raet blong kam insaed long kaos blong yumi, openem ol leta blong yumi, o distebem yumi o famili blong yumi wetaot wan gudfala risen.

## 13 Fridom blong mov

Yumi evriwan i gat raet blong go long ples we yumi wantem go long hem long kaontri blong yumi mo blong trave olsem we yumi wantem.

## 14 Raet blong lukaotem wan Sef Ples blong Stap long hem

Sipos yumi fraet blong oli tritim no gud yumi long kaontri blong yumi, yumi evriwan i gat raet blong ronwe i go long narafala kaontri blong stap sef.

## 15 Raet long wan Nasonaliti

Yumi evriwan i gat raet blong pat long wan kaontri.

## 16 Mared mo Famili

Evri bigman i gat raet blong mared mo gat wan famili sipos oli wantem. Ol man mo woman oli gat semak raet taem oli mared, mo taem oli seperet.

## 17 Raet long ol samting blong yuwan

Evriwan i gat raet blong gat samting blong olgeta mo serem olgeta. I nogat man i save tekemaot ol ting blong yumi wetaot wan gud risen.

## 18 Fridom blong tingting

Yumi evriwan i gat raet blong biliv long wanem yumi wantem bilivim, blong gat wan relijen, o blong jenis sipos yumi wantem.

## 19 Freedom of expression

Nous avons le droit d'avoir nos propres points de vue, de penser ce que nous voulons, de dire ce que nous pensons et de partager nos idées avec d'autres personnes.

## 20 Raet long Pablik Asembli

Yumi evriwan i gat raet blong mitim ol fren blong yumi mo wok tugeta long pis blong difendem ol raet blong yumi. No gat man bae mekem yumi joenem wan grup sipos yumi no wantem.

## 21 Raet long Demokrasi

Yumi evriwan i gat raet blong tekpat long gavman blong kaontri blong yumi. Evri bigman i shud alao blong jusum ol lida blong olgeta.

## 22 Sosol Sekuriti

Yumi evriwan i gat raet blong save pem haos, meresin, edukesen, mo jaelkea we i jip, mo inaf mani blong liv mo kasem medikol kea sipos yumi sik o yumi kam olfala.

## 23 Raet blong ol Wokman

Evri bigman i gat raet blong mekem wan wok, gat wan fea salari blong wok blong olgeta mo joenem wan tred yunion.

## 24 Raet blong Pleple

Yumi evriwan i gat raet blong rest long wok mo rilaks.

## 25 Kakae mo shelta blong evriwan

Yumi evriwan i gat raet long wan gud laef. Ol mama mo pikinini, pipol we oli olfala, oli no wok mo gat spesel nid, mo evri pipol oli gat raet blong oli lukaotem gud olgeta.

## 26 Raet long Edukesen

Edukesen hemi wan raet. Praemeri skul i shud fri. Yumi shud lanem abaot United Nations mo hao blong progres wetem ol narafala. Ol papa mo mama blong yumi oli save jusum wanem blong yumi lanem.

## 27 Kopiraet

Kopiraet hemi wan spesel loa we i protektem ol atistik kriesen mo raeting blong wan man: ol narawan oli no save kopi wetaot pemisen. Yumi evriwan i gat raet long wanwan wei blong living mo enjoyem ol gud samting we i kam werem 'Art', Saens mo lening.

## 28 Wan Wol we i fea mo i fri

I mas gat gudfala oda blong yumi save enjoyem ol raet mo fridom blong yumi insaed long kaontri blong yumi mo raon long wol.

## 29 Responsibiliti

Yumi gat wan diuti long ol narafala pipol, mo yumi shud rispektem ol raet mo fridom blong olgeta.

## 30 I No Gat Wan Man i Save Tekemaot ol Human Raet blong Yu.

United Nations





# Lesen 6: Sivil Sosaeti

## Wanem we bae yu lanem afta long lesen ia:

Gat moa save long mining blong Sivil Sosaeti mo motivetem ol studen we oli wantem kam wan gudfala mo moa aktiv sitisen.

## Ol mein toktok/tingting:

Sivil Sosaeti

## Ol Tingting blong statem seksen ia:

Difaenem Sivil Sosaeti

## Preperesen :

Pen mo pepa long kala blong mekem wan posta blong klas.



## Aktiviti blong Stat wetem: Givim mining blong Sivil Sosaeti

Divaedem klas long grup blong 3 o 4 mo askem long olgeta blong wok tugeta blong givim wan mining blong Sivil Sosaeti mo raetem daon. Givim 10 minits long grup. Afta askem long wanwan grup blong ridimaot mining blong olgeta. Diskasem.

### Talem ol toktok ia:

Sivil Sosaeti i tekem tugeta ol pipol we i wok tugeta olsem wan grup. Oli kolem ol grup ia Sivil Sosaeti Oganaesesen (CSO) mo tu ol Non-Gavman Oganaesesen (NGO) mo ol jej Oganaesesen.

Sivil Sosaeti hemi fom wetem ol oganaesesen ia we oli no asosiet wetem gavman. Hemia i inkludum sam skul mo yunivesiti, ol advokesi grup, ol profesonal asosiesen, ol leba yunion, ol jej, mo ol kaljurol institusen. Sivil Sosaeti i ofarem wan envaeronmen blong ol sosol muvmen, self-oganaesesen grup mo ol man, blong operet hem wan mo indipenden long steit.

Ol Sivil Sosaeti Oganaesesen i pleim plante difren rol. Oli ol impoten sos blong infomesen long tugeta saed sitisen mo gavman. Hemia hemi sam long ol impoten rol we oli karemaot. Hemi:

- Lukluk long ol polisi mo wok blong gavman mo mekem gavman i akaontebol;
- Engaj long advokesi we i minim se givim sapot long sam tingting mo givim ol difren polisi long gavman, praevet sekta mo ol narafala institusen;
- Sevesem spesieli ol pipol we oli pua mo olgeta we i stap long nid;
- difendem ol raet blong ol sitisen mo wok blong jenisim mo mentenem ol sosol fasin mo bihevia.

Askem klas blong kamap wetem moa aksen we Sivil Sosaeti i mekem e.g. oganaesem spot o kaljurol iven, envaeronmentol aksen.

### Talem ol toktok ia:

Ol sitisen i save toktok mo kam aktif memba blong Sivil Sosaeti. Oli save tekem aksen mo wok long ol isiu we pipol i intres long hem olsem proteksen blong neija mo envaeromen mo rispek long raet blong man.

Sivil Sosaeti i okupaem wan impoten posisen taem we i kam long taem we komuniti mo kaontri i nidim developmen.

Sivil Sosaeti i givim opotuniti blong ol komuniti i kam tugeta blong wok tugeta, toktok mo disaedem wanem blong evriwan i mekem. Long Vanuatu, yumi gat tradisonol fasin blong yumi blong oganaesem Sivil Sosaeti. Long plante komuniti, Nakamal hemi wanwan memba blong komuniti we Jif nao i hedem. Pipol long vilij i save kam wanples blong toktok tugeta mo diskasem mo kamap wetem ol desisen blong ful komuniti.

Wok long Sivil Sosaeti i wan wei blong muvum sosaeti blong talem wanem yumi nidim mo talemaot ol konsen blong yumi long lokol, nasonal, rijinol mo intenasonal level.

Plante Sivil Sosaeti Oganaesesen i gat ol ofis mo wokman. Be plante tu oli rilae bigwan long ol voluntia. Wok blong voluntia i wan gud wei blong mekem wan samting blong komuniti, mitim ol pipol mo wok tugeta mo tu save moa olsem wanem kaontri i wok. Wok blong voluntia i givim wan strong bes blong aktif sitisensip.

### Aktiviti: Givim nem blong wan Sivil Sosaeti Oganaesesen

Askem long ol studen blong leftemap han blong olgeta mo givim nem blong wan Sivil Sosaeti Oganaesesen we oli save long Vanuatu mo tokbaot smol wok blong olgeta. Ol eksampol i save inkludim:

- Vanuatu Red Cross;
- Live and Learn;
- Vanuatu Sosaeti blong ol pipol wetem Disabiliti;
- Vanuatu Women Senta;
- Wan Smol Bag.

Raetem ol nem blong ol oganaesesen long bod. Folem list i go daon mo eksplenem se Sivil Sosaeti i go kasem evri eria long laef blog yumi.



## From wanem nao Sivil Sosaeti hemi impoten?

Wan aktiv Sivil Sosaeti i helpem pipol mo komuniti. Olgeta Sivil Sosaeti oganaesesen i alaoem tu sam pat blong sosaeti we i no impoten, i no oganaes gud mo i nogat voes blong oli save toktok: olgeta we oli pua, olgeta we oli handikap, olgeta we oli tok nogud long olgeta.

Olgeta Sivil Sosaeti i pleim wan impoten rol long taem blong wan kraeses olsem ol naturool disasta. Olgeta oganaesesen olsem Red Cross i provaedem oltaem imidiet rilif long populesen afta long wan disasta.

Olgeta Sivil Sosaeti oganaesesen i save ajivim tu ol jenis long long-tem mo jenisim wan situesen o stretem wan samting we i no stret. Pipol i wok tugeta blong difendem ol interes blong evriwan, inkrisim akaontabiliti, provaedem solidariti mekanisim mo promotem patisipesen.

Evri man mo woman i impoten. Yumi evriwan i risponsibol semak mo wanwan long yumi i save pleim wan rol blong developem mo impruvum sosaeti blong yumi. Hemi wan simpol samting sipos yu wan gudfala neiba, wan gudfala man o woman we i rent o man o woman we i onem wan graon.

Askem long klas blong givim ol besik responsabiliti blong yumi olsem wanwan man o woman:

- rispek;
- koperesen;
- patisipesen.

Raetem ol tingting blong ol studen long bod.

### Aktiviti: Posta blong Sivil Sosaeti

Krietem wan posta blong ripresentem wan positiv, aktiv Sivil Sosaeti we i haelaetem ol mein toktok long list antap ia mo wanem nao i diskraebem Sivil Sosaeti: Advokesi, komuniti, wiling blong help etc.

Yu save putum tugeta plante pis A4 pepa blong mekem wan bigfala pis pepa. Hangem posta long klasrum o skol.





# Lesen 7: Media mo Sosol Media

## "Social Media, misinformesen, Disinformesen"

### Wanem we bae yu lanem afta long lesen ia:

Gat moa save long rol blong media, mo speseli sosol media long ol politikol proses blong Vanuatu, mo hao ol man oli yusum media, ol grup mo gavman blong influensem, sheipem opinion mo manejem ol disagrimen. Mo tu blong save luksave, faenemaot mo analaesem ol kiaman nius.

### Ol mein toktok/tingting:

Media, Social media, misinformesen, Disinformesen, fake news, influencer.

### Ol Tingting blong statem seksen ia: Pasem Mesej



## Aktiviti blong statem seksen ia: Pasem Mesej

Talem long ol studen oli stanap long wan laen, mo talem ol toktok ia long sorae blong fes studen:

**"Eleksen hemi long namba 1 Januari 2023 mo ol Poling Stesen oli open stat long 8 klok long moning kasem 6 klok long aftanun, mo yu mas karem nasonal ID kad blong vot."**

Askem long fes studen ia blong ripitim mesej ia long sorae blong nambatu studen we i stanap afta long hem. Ale studen ia bae pasem semak mesej i go long nambatri studen bihaen long hem, mo kontinu olsem i go.

Askem long las man long laen blong talemaot strong mesej we oli pasem long hem.

Ripitim fes mesej long klas mo luk hao oli tanem mesej ia! Mekem i klia se infomesen we yu kasem we i kam long maot blong wan man hemi no tru oltaem. Sipos we yu no kasem infomesen we i kam long stret sos, i gat bigfala janis se sam pat blong mesej ia i no stret. Yu mekem mesej ia i rilet long hao yumi stap kasem ol nius tede.

### Yu save se?

Nasonal media oganaesesen long kaontri hemi Vanuatu Broadcasting and Television Corporation (VTBC). Hemi givimaot ol nius mo tu ol program blong edukesen mo entateinmen. Hemi ofisol sos blong infomesen we gavman i yusum blong infomem pipol blong Vanuatu. VBTC i givim radio, televisen mo onlaen nius. Vanuatu hemi gat wan nasonal brodkasta nomo we hemi Television blong Vanuatu.

Bod we gavman i apoentem nao hemi administretem VTBC. Hemi wan indipenden kampani we steit i kontrolem mo hemi folem Broadcasting and Television Act. VBTC i kam anda long responsibiliti blong Praem Minista.

Hemia link blong websaet blong hem [www.vbtc.vu](http://www.vbtc.vu)

Long taem blong eleksen, plante infomesen i go raon. Hemi impoten tumas blong faenem ples we infomesen i kam long hem, from we yumi save finis se toktok we i kamaot long maot blong ol man i save kiaman long ol man. Vanuatu Elektoral Ofis (VEO) hemi ofisol sos blong infomesen long evri samtng long saed blong ol eleksen, infomesen blong ol vota mo ol kandidat. VEO i putumaot plante infomesen long olsem wanem blong rejista blong kam wan vota. Yu save faenemaot tu hao blong vot sipos we hemi festaem blong yu blong go vot.


Websaet blong VEO hemi [www.electoral.gov.vu](http://www.electoral.gov.vu).



## Aktiviti: Media

### Talem ol toktok ia:

Media hemi wan toktok we i kavremap ol difren fasin blong komuniket: brodkast long TV mo radio, pablisim nius long niuspepa mo intanet. Samtaem oli kolek "Press".



### Step 1:

Askem ol studen blong raetem ol ansa blong olgeta long ol kwestin ia long eksesaes buk blong olgeta:

Taem yu luk o harem wan niu stori o wan link long sosol media, hao nao yu save talem sipos hemi tru?

Givim sam taem long ol studen blong raetem ansa blong olgeta long eksesaes buk blong olgeta, mo talem long olgeta i tanem olgeta mo serem ansa blong olgeta wetem wan patna. Askem sam long ol student/grup blong tokbaot ansa blong olgeta.

### Step 2:

#### Talem ol toktok ia:

Hemia hemi impoten from wanem?

Yumi karem plante long ol infomesen blong yumi abaot wol, abaot politik, abaot ol politikol kandidat long ol difren kaen media sos. Mo hemia i mekem se wanem we oli stap talem, raetem, postem hemi impoten from we hemi jenisim wanem we yumi tingting mo biliv long hem.

**From risen ia, hemi impoten tumas blong toktok long ol studen abaot mining blong media.**

### Step 3:

Askem ol studen: Yufala i stap karem ol nius blong yufala long wanem sos? Raetem sam ansa long bod, mo askem ol studen blong lukluk konsep map blong "media" long Studen Wokbuk.

### Step 4:

Givim wan sot ovaviu blong media mo rol blong hem insaed long wan demokrasi.

### Talem ol toktok ia:

Wan fri pres hemi infomem pablik, hemi mekem se ol lida oli responsibol long ol samting we i hapen, mo i givim wan forum blong dibet o tokraon long olgeta nasonal isu. Long ol demokrasi, gavman hemi responsibol long ol aksen blong hem. Hemia nao i mekem se ol sitisen oli wantem save long ol desisen we gavman blong olgeta i stap mekem long bihaf blong olgeta. Pres i fasilitetem "raet blong save" ia, tru long wok blong sev olsem wan watdog ova long gavman, helpem ol sitisen blong mekem gavman i responsibol long olgeta aksen blong hem, mo kwestenem ol polisi blong olgeta.

Demokratik gavman i givim akses long ol jenalist long ol pablik miting mo ol pablik dokumen. Oli no stopem eniting o kontrolem wanem we bae jenalist i talem o printim.

Media i plei wan impoten rol long saed blong bildim pablik aweanes mo givim infomesen we i sheipem fasin mo pablik opinion. Media hemi wan strong tul we i stap kam antap, hemia long televisen, radio, o long intanet. Sosol media i stap ekspandem kwiktaem influens blong hem long evri aspek blong laef blong yumi.

Ol sitisen oli nid blong kasem gud infomesen blong mekem ol gudfala desisen taem i kam long taem blong ol isu long saed blong politik, espeseli taem oli stap disaed long hao blong vot long wan eleksen. Yumi evriwan i nid blong mekem sua se yumi save tristem ol nius mo ol narafala infomesen we bae save helpem yumi blong mekemap maen blong yumi taem yumi go blong vot.

### Step 5:

### Talem ol toktok ia:

Go long pej 21 mo 22 long Studen Wokbuk blong faenem ol definisen blong sam long ol denja blong dipen mo bilivim ol nius mo infomesen long sosol media.

Talem long ol studen oli lukluk list blong ol definisen long pej 21 mo 22, mo askemol voluntia blong ridimaot wan toktok wetem definisen blong hem. Afta askem olgeta blong traem tingbaot wan eksampol blong hemia tru long pesonal eksperiens blong hem. Givim sam eksampol sipos ol studen oli no save tingbaot eni eksampol.

### Step 6 :

#### Talem ol toktok ia:

Wan long ol bigfala denja we ol demokrasi oli stap fesem tede hemi ol kiaman nius mo rong infomesen we i stap kam antap onlaen, espeseli long taem blong eleksen. Wetem tumas "infomesen polusen", hemi had blong pipol i luksave wanem we i no tru mo kasem stret infomesen.

## Aktiviti: Sosol Media

**Sosol media:** Tokbaot ol wei we ol pipol oli yusum blong interakt bitwin olgeta blong krietem, serem, mo/o pasem infomesen mo ol tingting tru long ol sosol netwok. Hemia sam long olgeta mein sosol media platfom:



### Step 1 :

Tokraon long yus blong sosol media, mo yusum ol kwesten olsem:

- Hamas long yufala i stap yusum sam long ol sosol media ia olsem Facebook, Twitter, YouTube, Snapchat, mo sam narafala moa?
- Wanem nao i mekem se yufala i laekem mo i intresting long yufala?
- Wanem sosol media nao pipol i yusum plante long Vanuatu?
- Wanem sosol media nao ol yangfala oli yusum plante long Vanuatu?
- Wij wan long olgeta nao yufala i ting se bae save spolem pipol mo from wanem?

### Step 2 :

#### Talem ol toktok ia:

Sam sosol media i mekem yumi filim gud from we yumi save toktok long ol fren mo famili blong yumi, serem ol tingting blong yumi mo konek wetem pipol. Be sam long olgeta i save mekem we i no stret mo spolem man. Long ol dei blong tede, hemi moa isi blong hemi spred folem advans long teknoloji. Hemia nao yumi mas lukaot long wanem we yumi serem onlaen.

Evri infomesen we yumi krietem, postem o serem, i no se evriwan i tru o i no blong ol narawan oli lukim. Samtaem oli krietem kiaman infomesen o pleple wetem tingting blong pipol. Samtaem oli serem infomesen we i no stret olsem.

### Step 3 :

Talem long ol studen se i gat tu (2) kaen kiaman infomesen onlaen.

**Misinfomesen** – Taem pipol i serem wan infomesen we oli ting se hemi tru be hemi no tru (olsem eksampol, taem oli serem kiaman infomesen, be oli no minim blong spolem eniwan).

#### Talem ol toktok ia:

Plante taem oli tekem tufala toktok ia 'disinformesen' mo 'misinformesen' olsem ol "kiaman nius".

**Disinformesen** – Taem pipol i serem o oli minim blong givim kiaman infomesen.

Askem ol studen blong serem sam pesonal stori long saed blong misinformesen / disinformesen.

### Step 4:

#### Talem ol toktok ia:

Ol negatif impak blong Disinformesen long wan demokrasi hemi bigwan tumas.

Hemi had blong luksave fasin blong serem kiaman infomesen onlaen. I gat pipol we oli minim nomo blong krietem kiaman samting blong influensem pablik opinion mo mekem pipol i konfius. Be i gat ol wei we yumi save luksave fasin ia.

### Step 5:

Talem long ol studen blong luk long: "Olsem wanem blong luksave ol Kiaman Nius" long pej 23 blong Studen Wokbuk. Go tru long wanwan long ol 8 wei we oli talem blong jekem sipos samting ia hemi ril o kiaman wan. Askem olgeta we oli tekpat long eksampol blong olgeta (i no abaot eleksen nomo) mo givim ol narafala eksampol.



# Olsem wanem blong luksave ol kiaman nius



## Jekem Sos blong Infomesen

Klik long Sos festaem blong faenemaot infomesen long websaet, misen blong hem mo ol kontak infomesen blong hem.



## Jekem Man we i raetem Nius

Lukaotem infomesen abaot Man we i raetem nius ia. Bae yu save trastem infomesen we oli serem? Wanem hemi talem i tru?



## Jekem Deit

Fasin blong serem o postem ol ofala nius i minim se oli rilet yet long wanem we i stap gohed naoia.



## Wanem Bilif blong yu

Luk sipos ol Bilif blong yu bae save jenisim lukluk blong yu long saed ia.



## Ridim ful storian

Ol hedlaen oli save shokem man we i rid blong mekem hemi klik long ol link. Wanem nao ful storian?



## Ol nara Sos we oli sapotem infomesen

Klik long ol narafala link. Luk sipos infomesen we i kamaot hemi sapotem gud storian ia.



## Hemia i Tru ia? Mekem risej.

Sipos hemi go tumas, ating hemi stap mekem fani ia. Jekem websaet mo man we i raetem nius blong yu sua long infomesen.



## Askem ol Ekspet

Askem wan man we i wok long laebri, o go long wan websaet blong jekem infomesen ia.

# Lesen 8: Sistem blong Gavman blong yumi long Vanuatu



## Wanem we bae yu lanem afta long lesen ia:

Moa save long sistem blong gavman long Vanuatu, inkludum ol 3 branj blong gavman, Konstitusen, provinsol mo munisipol gavman.

## Ol mein toktok/tingting:

Ripablik, Ripresentativ Demokrasi, Palementari Demokrasi, Lejislesa, Eksekutiv, Judisieri, Seperesen blong ol Paoa, Konstitusen, Gavman, Kabinet, Oposisen.

## Ol Tingting blong statem seksen ia:

Ol kwesten long saed blong politik



## Preperesen :

Kopi mo katemaot ol toktok mo ol mining blong olgeta long pej 50 mo seperetem olgeta long ol smosmol pis pepa. Bambae yumi yusum olgeta afta insaed long klasrum blong mekem wan matjing ekseesaes.



## Aktiviti blong statem lesen ia: Ol Kwesten long saed blong Politik

Seperetem klas long 2 tim blong 3 o 4 man. Askem long wan man long wan tim blong hem i raet mo redi long wan pen mo pepa. Plante long ol kwesten daon ia oli isi be poen blong eksesaes ia hemi blong soem long ol studen se oli save moa long wanem we oli ting se oli save mekem abaot topik blong politik.

Askem wanwan long ol 20 kwesten daon ia long saed blong Vanuatu gavman mo politik. Givim smol taem long ol studen blong raetem daon ol ansa blong olgeta. Long en blong hem, ridimaot ol kwesten bakegen, mo givim ansa. Blong wanwan korek ansa, tim i skorem 1 poen.

Ademap ol poen mo tim we i gat hae namba hemi win.

### Ol Kwesten long saed blong Politik – Ol Kwesten mo Ansa blong ol Tija

(Lukaot from sam ansa i save jenis folem taem, olsem nem blong PM.)

1. Wanem nem blong Praem Minista?
2. Palemen Haos i stap wea? (long Port Vila)
3. Wanem deit blong Indipendens? (30 Julae 1980)
4. MP i minim wanem? (Membra blong Palemen)
5. Wanem Karensi nao yumi yusum olsem ligol tenda blong kaontri? (Vatu)
6. Sipos hemi yu komitim wan siries kraem, bae oli save putum yu long wea? (Kot mo/o kalabus)
7. Wanem nao ol ofisol langwis blong Vanuatu? (Inglis, Franis, Bislama)
8. Wanem toktok nao oli yusum blong tokbaot taem we pipol i vot from ol memba blong palemen blong olgeta o Pronvinsol Kaonsel? Toktok ia i stat wetem wan 'E'? (Eleksen)
9. Wanem nem blong wan rul we Palemen i mekem (i stat wetem wan 'L')? (loa o lejislesen)
10. Long Vanuatu, yu save vot stat long wanem ej? (18 yia)
11. Vanuatu hemi wan memba blong Commonwealth? (Yes)
12. Wanem nem nao oli givim long wan politikol sistem we paoa i stap long han blong pipol mo hemi rispektem ol human raet? Toktok ia i stat wetem wan 'D'. (Demokrasi)
13. Wanem nem nao oli givim long wan politikol sistem we plante taem oli no rispektem ol human raet, mo i no gat wanfea eleksen? Toktok ia i stat wetem wan 'D'. (Diktetasip)
14. Sam demokrasi oli ol monaki tu, hemia i minim se hed blong kaontri hemi wanem? (wan King o Kwin)
15. Wanem nasonal motto blong Ripablik blong Vanuatu? (LONG GOD YUMI STANAP hemi Bislama blong talem se "IN GOD WE STAND")
16. Yumi bon wetem sam raet mo fridom, from nomo se yumi ol human. Hemia yumi kolek wanem? (Ol Human Raet)
17. Lasfala Nasonal Jenerol Eleksen long Vanuatu i bin tekem ples long wanem yia?
18. Wanem nem blong pis blong pepa we pipol i yusum blong vot wetem? (balot pepa)
19. Loa we hemi moa impoten mo hemi moa hae long eni kaontri, oli singaotem se wanem? I stat wetem wan 'C'... (Constitution)
20. Wanem nem blong wol oganaesesen we hemi eim blong mentenem intenasonal pis mo sekuriti? (United Nations)

## Vanuatu mo Demokrasi

**Konstitusen (Mama Loa) blong yumi i talem se: "Long Vanuatu bambae ol sitisen oli holem paoa blong rulum kaontri mo bambae oli elektem ol memba blong Palemen we bambae oli givim paoa long olgeta blong oli rul."**



### Long Vanuatu, i gat tri (3) ofisol branj blong paoa:



#### Lejislesa

Fes wan hemi LEJISLESA. Hemia hemi olgeta Memba blong Palemen blong yumi we oli gat paoa blong mekem ol loa blong kaontri from we ol sitisen oli elektem olgeta.



#### Judisieri

Nambatu hemi JUDISIERI. Hemia hemi ol Kot, loea, majistret mo jaj we oli intapretem ol loa blong kaontri.



#### Eksekutiv

Nambatri hemi EKSEKUTIV. Hemi olgeta we oli aplae ol loa mo polisi blong gavman. Praem Minista mo Kaonsel blong ol Minista nao oli fomem Eksekutiv, we i fomem Gavman.

Ol trifala branj blong gavman – lejislesa, eksekutiv mo judisieri – oli gat ol seperet, independen paoa mo responsibiliti. Hemia blong mekem se olgeta long wan branj oli no gat konflik wetem olgeta long tufala narafala branj. Hemia nao oli singaotem "Seperesen blong ol Paoa".

Seperesen blong ol Paoa ia oli disaenem tu blong mekem se i no gat wan grup i gat evri paoa. Indipendens blong wanwa branj i help blong mekem se ol narafala wan oli no go bitim paoa blong olgeta; mo long fasin ia hemi mekem se evriwan i folem loa mo protektem ol raet blong wanwan man. Seperesen blong ol Paoa hemi impoten from se hemi provaedem wan impoten sistem blong ol jek mo balens.

Hemia hemi mekem sua se ol difren branj oli kontrolem wanwan long olgeta mo mekem olgeta oli akaontebol long wanwan long olgeta - hemia nao yumi minim tru long "Jek". Seperesen blong ol Paoa i seperetem ol paoa bitwin ol difren branj blong gavman - hemia nao yumi minim tru long "Balens." Balens hemi eim blong mekem sua se i no gat wan man o grup blong pipol long gavman oli "gat ful paoa". Oli serem paoa mo hemi no stap fulwan long wan branj nomo. Ol trifala branj oli no dipen long wanwan long olgeta. Wan i no shud gat moa paoa bitim narafala wan o gat influens long hem.



## Aktiviti blong mekem: Matjem ol toktok wetem ol mining

Yusum ol pis pepa we yu bin priperem bifo klas, serem wan toktok o wan mining long evri studen (o long tu/tri studen) mo askem olgeta blong wokbaot raon long rum mo faenem stret mining blong wan toktok. Askem ol grup blong tokraon long ol toktok ia mo ol mining blong olgeta.

Afta askem long ol studen blong ridimaot ol toktok blong olgeta mo mining blong olgeta, mo givim moa eksplenesen long olgeta. Mekem hemia kasem taem evri grup i toktok blong mekem sua se evriwan oli kasem gud.

Toktok	Mining
<b>Palementri Demokrasi</b>	Vanuatu i gat kaen gavman ia, we ol sitisen oli elektem ol representativ long wan lejisletiv Palemen blong mekem ol neseleri loa mo desisen blong kaontri.
<b>Gavman</b>	Hemia hemi wan kolektiv tem we i minim wan grup blong pipol wetem otoriti blong rul ova long wan kaontri.
<b>Konstituensi</b>	Hemia hemi wan eria long kaontri we ol vota blong hem oli elektem wan representativ long wan lejisletiv o ripresentativ bodi.
<b>Memba blong Palemen (MP)</b>	Hemia hemi representativ we ol vota long wan konstituensi oli elektem i go long Palemen.
<b>Kabinet</b>	Sam memba blong Palemen oli jusum olgeta olsem ol Minista responsibol long sam aspek blong ol afea blong kaontri, olsem ekonomi, edukesen o envaeronmen. Tugeta, ol Minista oli fomem Kabinet.
<b>Palemen</b>	Bodi ia i gat 52 memba we oli gat paoa blong mekem ol niu loa, we oli singaotem tu se lejisletiv paoa.
<b>Eksekutiv</b>	Praem Minista mo Kabinet nao oli fomem branj blong gavman ia. Wok blong olgeta hemi blong implementem ol loa we Palemen i pasem.
<b>Judisieri</b>	Hemia hemi ligol sistem long Vanuatu.
<b>Tri branj blong gavman</b>	Hemia hemi toktok we oli givim long lejislesa, eksekutiv mo judisieri.

## Tri (3) level blong gavman: Nasonal, Provinsol mo Munisipol

Long Vanuatu, yumi gat tri (3) bodi we oli ripresentem pipol long Nasonal, Provinsol mo Munisipol level.

### Palemen hemi wanem?



Nasonal Palemen blong Vanuatu hemi gat 52 memba. Oli kolek olgeta ol Memba blong Palemen o ol MP. Palemen hemi fom tru long olgeta representativ we pipol i elektem olgeta. Taem oli win long wan eleksen from pipol i vot from olgeta, oli kam ol MP.

Wanwan long ol 52 MP long Palemen oli ripresentem pipol long 18 konstituensi long Vanuatu. Wan konstituensi hemi wan eria blong kaontri we wan o moa memba blong Palemen oli lukaotem. Siks (6) konstituensi insaed long kaontri oli gat wan memba blong Palemen nomo (singol memba konstituensi), mo ol narawan oli gat bitwin tu (2) mo seven (7) memba (malti-memba konsituensi).

Ol MP oli mit insaed long Palemen Haos long Port Vila. Oli tokraon long ol niu loa mo ol developmen plan blong kaontri mo mekem ol desisen abaot hao blong ranem kaontri blong yumi. Palemen oli elektem blong fo (4) yia. I no moa gat Palemen long en blong fo (4) yia stat long deit blong eleksen blong hem. Long taem ia, oli singaotem gavman olsem 'keateka'. Keateka Gavman i lukaotem ol afea blong kaontri kasem taem we oli holem ol niufala eleksen.

Eleksen blong wan niu Nasonal Palemen i tekem ples insaed long wan period blong 60 dei maksimam afta we oli disolvem palemen. Gavman i fom tru long ol MP we oli elektem, we oli save jusum olgeta olsem ol Minista.

## Wanem wok blong wan MP?

Ol Memba blong Palemen oli mekem ol loa blong kaontri. Palemen i gat paoa blong mekem ol loa blong pis, oda, mo lidim gud Vanuatu.

Wan Memba blong Palemen i ripresentem pipol blong konstituensi blong hem. Hem i shud save long ol nid mo ol praeoriti blong pipol long konstituensi blong hem.

Gat ol miting mo diskasen oltaem wetem pipol insaed long konstituensi i helpem MP blong save wanem nao ol impoten divelopmen blong olgeta we oli nidim, olsem ol klinik, ol rod, ol skul, wota, sanitesen, ol wok mo ol aktiviti we oli mekem mani aot long hem. Pipol i gat raet blong go long ol miting ia mo askem ol kwesten long MP blong olgeta.

Sipos we MP i no mekem wanem we pipol i askem hem blong mekem o no mekem wanem we hemi promesem ol pipol blong mekem, pipol i gat janis blong votem narafala man long neks eleksen.

Ol MP oli shud wok blong provaedem ol besik sevis blong evriwan, mo oli shud tritim evri difren komuniti long semak fasin.

Pipol i gat raet blong askem long ol MP blong olgeta abaot wanem nao ol divelopmen plan we i stap blong konstituensi blong olgeta mo hao nao bae ol plan ia bae oli impruvum laef blong olgeta.





## Provinsol Kaonsel hemi wanem?

I gat siks (6) provins long Vanuatu mo wanwan long olgeta i gat wan Provinsol Kaonsel:

- Torba
- Sanma
- Penama
- Malampa
- Shefa
- Tafea

Pipol i elektem ol Provinsol Gavman Kaonsel blong wan period blong fo (4) yia. Minista blong Intenol Afea i apoentem sam memba tu blong ripresentem ol jif, jej, woman mo yangfala. Aot long olgeta kaonsela, bambae oli elektem wan Jeaman olsem hed blong Kaonsel.

Ol Provinsol Kaonsel oli responsibol long gudfala manejmen blong Lokol Gavman eria. Wok blong olgeta hemi blong promotem helt mo welfea blong pipol we oli liv long hem. Oli save apruvum ol bae-loa mo ol standing oda we oli ol sabsidari loa, semak olsem ol munisipaliti (luk long neks pej).



## Munisipaliti hemi wanem?

I gat tri munisipaliti long Vanuatu:

**Luganville (Espiritu Santo)**  
**Port Vila (Efate)**  
**Lenakel (Tanna)**

Ol vota long Luganville mo Port Vila oli jusum ol lokol representativ blong olgeta long ol Munisipol Kaonsel long eleksen evri fo (4) yia. Long Lenakel, Minista blong Intenol Afea nao i apoentem ol kaonsela blong wan period blong fo (40) yia. Aot long ol kaonsela, bae oli elektem wan we bae hemi kam Meya blong lidim Munisipol Kaonsel. Mo semak olsem ol Provinsol Kaonsel, ol Munisipaliti oli responsibol long welfea blong ol sitisen mo ol sevis blong evri dei olsem ol skul mo helt klinik.

## Aktiviti blong mekem: Ol Kwesten long saed blong Palemen

Askem ol studen blong openem Studen Wokbuk mo ansarem ol kwesten long saed blong Palemen. Oli shud raetem ol ansa insaed long ol ekseaes buk blong olgeta.

- Wanem nem blong Praem Minista?
- Wanem nem blong Memba blong Palemen (MP) blong konstituensi blong yu?
- Wanem nao wok blong wan Memba blong Palemen?
- "Seperesen blong ol Paoa" hemi wanem?

Givim 10 minit long ol studen blong finisim wok ia. Afta askem olgeta blong leftemap han blong olgeta mo taem i kam long taem blong wan studen, bae hemi ridimaot ol ansa blong hem.

Mekem wan diskasen afta long hem.



# Lesen 9: Wanem nao i mekem wan gudfala lida?

## Wanem we bae yu lanem afta long lesen ia:

Bildimap save long ol fasin blong ol gud lida mo ol representativ.

### Ol mein toktok/tingting:

Ol Lida, ol Representativ.

### Ol Tingting blong statem seksen ia:

Wanem tingting blong yu long lidasip?

### Preperesen :

Bigfala pepa mo ol difren kala pen/peint.



# Lidasip

Raetem toktok ia "Lidasip" long bod. Askem ol studen blong talem fes samting we i kam long tingting blong olgeta taem oli luk toktok ia "Lidasip."

Askem ol studen blong adem ol toktok blong olgeta long bod blong krietem wan snapsot blong ol asosiesen we yumi gat wetem tingting ia blong "Lidasip". Tokbaot ol kaen lida we ol studen oli save (ol lida insaed long komuniti blong olgeta, jej, skul, gavman, etc).

## Kwesten blong klas i tokraon long hem (o tingting/wok tugeta/serem tingting):

### Man i bon blong i kam wan lida o hemi bildimap hem wan blong kam wan lida?



Askem ol studen blong tingting long wan man we oli save we hemi wan lida (kapten blong tim blong spot, skul kapten, ol lida insaed long famili, ol lida long wokples, ol lida long skul, ol lida insaed long grup blong ol fren, ol lida long ol klab, ol lida ong komuniti). Askem ol studen blong tingting long wanem ol man ia oli save mekem blong kasem wan posisen blong lida (edukesen, laef eksperiens, trastem hemwan, wantem blong sevem pipol, gat strong tingting blong wok from pablik intres).

## Aktiviti: Olgeta Kwaliti blong wan gudfala lida

Askem ol studen blong tingting long ol kwaliti we i mekem se wan man hemi wan gudfala lida mo raetem olgeta long wan list insaed long eksesaes buk blong olgeta. Givim 8 kasem 10 minit blong oli listim plante kwaliti we oli save tingbaot.

Askem ol studen blong leftemap han blong ogeta mo ridimaot wan long olgeta kwaliti we oli putum long list blong olgeta. Raetem kwaliti ia long bod. Askem olgeta blong leftemap han sipos oli raetem hemia (o wan ansa we lelbet semak) long list blong olgeta. Raetem namba blong ol han we oli agensem kwaliti ia. Afta muv i go long neks kwaliti mo gohed long semak fasin kasem taem we evri kwaliti we ol studen oli tingting long hem, oli stap long bod. Finis, askem ol studen blong leftemap han blong rankem kwaliti we i moa impoten. Askem wan studen blong kam long bod mo rankem olgeta kwaliti ia long wan niu kolumn mo putum hemia we i moa impoten bitim ol narawan antap.

Yu save adem sam long ol kwaliti daon ia long list blong wan gudfala lida.



Wan gudfala lida hemi wan man we hemi:


- lisen long pipol mo hemi kea long ol nid blong olgeta;
- putum ol nid blong pipol feswan;
- hones mo hemi no pat insaed long fasin blong korapsen;
- yusum mani blong gavman blong impruvum laef blong pipol insaed long komuniti;
- mekem sua se komuniti i kasem wanem hemi nidim olsem ol rod, skul mo ol helt klinik;
- fea mo tritim evriwan semak mo wetem rispek;
- faet blong impruvum laef olgeta we oli pua, ol komuniti we oli moa smol, olgeta we oli no strong mo oli gat spesel nid;
- kea abaot neiija mo envaeronmen.

Yu mekem i klia se fasin blong wan man i moa impoten bitim hao hemi luk, jenda, maritol stetes blong hem, rilesensip blong hem wetem yu mo komuniti etc.

## Talem ol toktok ia:

Taem i kam long taem blong jusum representativ blong yu long taem blong eleksen, ol kandidat bae oli traem blong winim tingting blong pipol blong vot blong olgeta. Bae oli mekem promes long plante samting mo hemi impoten blong tingting gud long gudfala kandidat. Wanwan long yumi i gat ol difren lukluk long wanem nao hemi moa impoten mo evriwan i gat raet long tingting long hem wan. Be blong vot o jusum gud lida blong yu, yu shud tekem taem blong faenemaot plante infomesen abaot kandidat blong yu.

# Wan Gudfala Lida



# Olgeta Woman oli ol gudfala lida

## Talem ol toktok ia:

Long Vanuatu mo long Pasifik rijen, yumi gat sam woman long ol posisen blong paoa o long gavman. Ating from hemi kalja. Long ol nara pat blong wol tu, ol man nao oli stap oltaem long wol blong politik, be tedei, hemia i stap jenis. Raon long wol, ol woman oli kam moa konfiden mo pipol oli stap kam blong luk save se ol woman oli ol gud lida.

Ol woman oli ol gudfala lida from se oli putum ol pikinini mo komuniti blong olgeta feswan.

Oli tingbaot fiuja from oli tingbaot ol pikinini blong olgeta mo oli mekem plan blong fiuja.

Plante woman long ol profesonal posisen oli rispektem olgeta from se oli hones, oli oganaesem gud olgeta, oli save mekem gud wok blong olgeta mo oli gat save.

Haf blong populesen hemi ol woman. Vanuatu i gat plante woman we oli wok had, oli gat talent mo oli profesonal. Nomata se hemi moa had blong wan woman, be yumi gat plante woman we oli kwalifae we oli save mekem wan gudfala wok blong representem komuniti blong olgeta mo faet blong impruvum living kondisen.

hemi had blong ol woman blong faenem wan balens bitwin profesonal mo famili laef. Plante taem wan woman hemi gat tu (2) wok: wan long profesonal wol, mo narawan long haos, lukaotem ol pikinini mo hom.

## Aktiviti blong mekem: Drowem representativ blong yu we i stret long tingting blong yu

Mekem sua se ol Studen Wokbuk oli klos blong ol studen oli no luk ilustresen blong "Wanem nao i mekem wan man i kam wan gudfala lida?".

Askem ol studen blong fomem ol grup blong 2 pipol o ol smosmol grup. Wanwan gud i shud drowem representativ blong olgeta we i stret long tingting blong olgeta mo raetem samples 3 impoten kwaliti we wan lida i shud gat. Talem long olgeta oli krietiv olsem we oli wantem.

Givim 20 minit long olgeta blong oli komplitim ol disaen blong olgeta. Long en blong sesen ia, askem wanwan grup blong go hangem drowing blong olgeta long foret blong klasrum. Holem wan klas diskasen long wanwan drowing. Tekem not long hamas long olgeta we oli inkludum ol woman insaed long drowing blong olgeta (o no).

## Aktiviti: Ol Woman lida we plante man i save long olgeta

Askem klas blong givim nem blong ol woman lida we oli save long bifo o long taem naoia insaed long Vanuatu mo narafala ples aotsaed long kaontri. Raetem ol ansa long bod. Ol ansa ia i save inkludum:

- Jacinda Arden (Praem Minista blong New Zealand);
- Presiden Hilda Heine blong Marshall Islands (2016-2020);
- Honorobol Fiame Naomi Mata'afa blong Samoa (hemi kam Praem Minista long Mei 2021);
- Dame Carol Kidu blong Papua New Guinea (sev plante taem olsem wan MP, mo afta olsem Minista);
- Angela Merkel (Jansela blong Germany blong 16 yia);
- Kamala Harris (Vaes Presiden blong United States).



# Lesen 10: Olgeta Eleksen long Vanuatu

## Wanem we bae yu lanem afta long lesen ia:

Bildimap save long pepos mo ol proses blong ol eleksen, speseli ol kraeteria blong demokratik eleksen.

## Ol mein toktok/tingting:

Eleksen, Vot, Pol, Universal Suffrage, Fri mo Fea Eleksen, Sikret Balot

## Ol Tingting blong statem seksen ia:

Fasin blong vot long Pablik



## Aktiviti blong statem lesen ia: Fasin blong Vot long Pablik

Ridim ol statmen daon ia mo askem ol studen blong leftemap han sipos oli agri "yes" wetem statmen ia. Jusum wan studen blong stap kaontem ol han mo raetem ol risal long bod (eksampol 12/25). Ol tija oli save mekemap ol statmen blong olgeta olsem long klas.

Ol eksampol blong statmen:

1. Ol puskat oli moa gud bitim ol dog;
2. Ragbi i moa gud bitim futbol;
3. Saens i moa gud bitim Inglis.

Long en blong aktiviti, eksplenem se hemia hemi wan kaen fasin blong vot. Eksplenem long ol studen se hemia nao stamba blong demokrasi mo fasin blong vot i kamaot long hem.

### Talem ol toktok ia:

Fes demokratik fom blong gavman i binvelop long ol taem bifo long Greece. Hemia hemi long namba 6 senturi bifo Kraes. Long Athens, olgeta we oli konsidarem olgeta olsem ol sitisen, rij mo pua, oli patisipet fulwan long gavman. Be, ol pikinini, ol woman, ol slev, mo ol man narafala kaontri we oli ripresentem kolosap 90 pesen blong populesen, oli no konsidarem olgeta olsem ol sitisen mo oli no alao blong vot!

Ol man oli mit long siti skwea blong tokbaot mo votem ol impoten isu. Vot i tekem ples long pablik - ol sitisen oli leftemap han blong olgeta blong vot long ol isu. Ol desisen we oli mekem oli kam ol loa.

Ol samting oli jenis bigwan kasem tede. Tede yumi evriwan i no save go tugeta mo leftemap han blong vot, i mekem se yumi elektem ol representativ olsem ol Memba blong Palemen, Provinsol Kaonsel mo Munisipaliti blong karemaot gavanens long evri dei mo administresen blong kaontri long bihaf blong yumi. Pipol i elektem olgeta i go long ofis mo from hemia, oli responsibol blong ansarem pipol.

## Aktiviti: Introdaksen

### Talem ol toktok ia:

Vot long ol eleksen i givim yu janis blong yu gat wan voes tru long man we i ripresentem yu. Wanem nao pepos blong ol eleksen insaed long wan demokratik sosaeti? From wanem oli impoten?





Wan eleksen hemi wan proses we wan populesen i jusum wan memba blong wan politikol pati o wan independen kandidat blong ripresentem olgeta mo holem wan pablik ofis o wan posisen insaed long gavman. Ol eleksen hemi wan gudfala pisful wei blong jusum ol politikol lida mo tu blong mekem ol impoten lejisletiv desisen we i influensem wei we sosaeti i wok.

**Talem ol toktok ia:**

Ating yu yu yang tumas blong vot long ol politikol eleksen naoia, be wan dei yet bae yu kasem 18 yia. Be, long evridei yumi stap gat finis ol difren kaen wei blong vot. Eksampol hemi hao yu disaed long ples blong go mitim ol fren blong yu, hao famili blong yu i disaed logn wanem blong kakae long naet, evriwan i kam daon long wan fasin blong vot, we bae hemi no demokratik oltaem. Eksampol, i save gat wan man we bae hemi disaed blong evriwan. Samtaem pipol i negosietem ol desisen tru long wan grup diskasen mo taem oli kasem wan 'Consensus'. Consensus hemi taem se evriwan i agri long faenal desisen.

**Klas diskasen:**

**Askem ol studen blong serem ol eksperiens blong olgeta.**

**Oli bin vot from wan samting finis olsem wan feveret singsing blong wan kompetisen blong singsing?**

**Vot from representetif blong klas?**



**Askem tu se oli bin go finis long wan eleksen wetem papa o mama?**

Rimaendem ol studen abaot topik we yumi luk finis long saed blong 'Olgeta Raet mo Responsibiliti.

Talem long olgeta se fasin blong vot hemi wan gudfala eksampol we hemi tu (2) samting, wan raet mo wan responsibiliti (long semtaem).

**Talem ol toktok ia:**

Wan eleksen hemi wan taem we pipol i jusum hu ia bambae i ripresentem olgeta. Hemi nao oli kolek fasin blong vot.

Representation of the People Act (RPA) hemi mein elektrol loa long Vanuatu, nomata we i gat sam narafala wan tu.

Ol eleksen oli ol mein pat blong wan demokrasi. Wan eleksen hemi wan bigfala opotuniti blong mekem jenis. Hemia hemi janis blong yumi blong jusum ol niu lida we bae oli wok blong gud blong kaontri mo pipol blong hem. Hemia hemi wan taem we pipol i save tingbaot wanem oli wantem blong Vanuatu mo olsem wanem kaontri i save impruv.

Politik hemi blong evriwan, hemi no blong ol jif mo ol bigfala man nomo. Politik hemi abaot faet from wanem we yu biliv long hem mo stanap from ol raet blong yu mo raet blong ol pipol insaed long komuniti blong yu. Evriwan i save kontribut blong mekem se Vanuatu hemi wan gud mo prosperos kaontri blong evri sitisen. Ol yang pipol oli gat wan impoten rol blong ple from ol politikol desisen bae oli afektem fiuja blong olgeta.

**Long Vanuatu i gat ol difren kaen eleksen:**

- **Ol Nasonal Jenerol Eleksen** taem ol vota oli jusum ol memba blong Palemen blong olgeta;
- **Ol Provinsol Eleksen** blong jusum ol memba blong ol Provinsol Kaonsel;
- **Ol Munisipol Eleksen** long Port Vila, Luganville mo Lenakel taem oli jusum ol memba blong ol Munisipol Kaonsel;
- **Ol Nasonal Referendum** taem oli askem ol vota blong apruvum wan bill o no blong wan amenmen blong Konstitusen blong Palemen i pasem.

Ol eleksen oli tekem ples evri fo (4) yia. Long dei blong eleksen, pipol oli go long ol Poling Stesen blong olgeta mo kastem vot blong olgeta blong kandidat blong olgeta we oli jusum. Vanuatu Elektrol Komisen nao hemi supavaesem ol eleksen mo Vanuatu Elektrol Ofis hemi oganaesem olgeta.



Long Vanuatu, yumi gat Malvatumauri tu we hemi Nasonal Kaonsel blong ol Jif. I gat 22 Jif insaed long Kaonsel we oli givim advaes long gavman long saed blong ol tradisen mo ol indijenes Melanesien valiu.



## Elektrol Komisen hemi wanem?

Elektrol Komisen blong Vanuatu hemi hae elektrol otoriti long kaontri. Hemi responsibol blong lukluk long rejistresen blong ol vota, mentenem elektrol rejista mo supavaesem ol eleksen. "Rejista" hemi list blong evri vota we oli rejista insaed long kaontri. Komisen i supavaesem ol elektrol operesen, proses blong nominesen blong kandidat mo hemi talemaot ol risal blong ol eleksen. Komisen i mekem sua se elektrol proses oli mekem folem ol loa blong Vanuatu.

## Vanuatu Elektrol Ofis hemi wanem?

Vanuatu Elektrol Ofis (VEO) i responsibol long administresen mo evri praktikal aspek blong oganaesem eleksen. Hemi kontrolem badjet blong eleksen mo hemi responsibol blong rejistarem ol vota. Sam pipol oli wok olsem wan tim insaed long VEO blong priperem ol eleksen.

VEO hemi ofisol sos blong infomesen long evri samting long saed blong eleksen. Elektrol Ofis i gat plante impoten infomesen long saed blong ol eleksen, elektrol ligol fremwok. ol fom, hanbuk mo sam narafala samting moa. Elektrol Ofis i stap long Port Vila.

Hemia websaet adres: [www.electoral.gov.vu](http://www.electoral.gov.vu)

Elektrol Ofis i gat wan pej tu long Facebook: [facebook.com/vanuatuelectoraloffice](https://www.facebook.com/vanuatuelectoraloffice)

## Rejistresen blong Vota

Evri sitisen blong Vanuatu we oli kasem 18 yia oli shud go rejista blong stap long elektrol roll mo save tekem pat long ol eleksen. Ol sitisen oli mas mekem sua se oli gat wan Nasonal Aedentiti Kad. Hemi hemi impoten tumas blong pruvum huia yu (aedentiti blong yu). Long taem blong Eleksen, ol vota we oli rejista oli save vot tru long Nasonal Aedentiti Kad blong olgeta nomo.

Evriwan i shud mekem sua se evri pipol wetem ol disabiliti oli save gat akses long ples blong vot, karem wan Nasonal ID Kad mo rejista long elektrol roll. Evriwan i gat raet blong karem wan Nasonal ID Kad, mo taem oli kasem 18 yia, blong vot. Hemi i inkludum tu ol pipol we oli no save rid mo pipol wetem ol disabiliti. Hemi wok blong yumi olsem ol sitisen blong givhan long olgeta we oli no save rejista o vot blong olgeta.

## Yut

Ol yang pipol oli gat wan impoten rol insaed long politikal laef blong kaontri. Tingbaot se wanem we i hapen mo wanem we gavman i disaedem bae hemi afektem laef blong yu.

No ting se from yu yang bae yu no save eni samting. Yu save wanem yu wantem mo nidim long fiuja, blong yu, blong famili blong yu, mo blong kaontri blong yu. Hemia nao from wanem yu mas rejista, tingting gud mo lisen long wanem ol politisen oli stap tokbaot mo go vot.

Ol yang pipol tu oli save kam ol kandidat. Yu save kam wan kandidat blong Palemen taem yu gat 25 yia, mo blong Provinsol Kaonsel taem yu kasem 21 yia.

## Klas diskasen: Agri o no agri

- Oli shud karemaot raet blong vot long olgeta pipol we oli no vot.
- I no nid blong vot – bae nogat samting i jenis.
- Gavman i no mekem wan samting long mi.
- Vot blong mi bae no save mekem wan difrens.
- Politik i no intresting.



Mekem las rimak wetem klas, haelaetem impotens blong vot, blong gat wan voes, kipim ol memba blong Palemen oli akaontebol, mo impruvum sosaeti.

## Aktiviti: Wan Fri mo Fea Eleksen hemi wanem?

Askem klas blong talem mining blong toktok ia "fri mo fea" eleksen. Lisen long sam studen we oli givim ol definisen blong olgeta.

### Talem ol toktok ia:

Ol eleksen oli mas fri mo fea, tru mo man i save bilivim blong evriwan i save akseptem. Oli mas mitim tu ol intenasonal standed blong gudfala elektrol praktis. Ol eleksen oli mas riflektem fri ekspresen blong wil blong pipol.

Wan eleksen i "fri" taem evriwan we oli rejista oli alao blong go mo vot. Hemia i minim se evriwan i gat akses long ol Poling Stesen mo i no gat wan komuniti we oli livim bihaen o stopem blong vot. Hemi minim tu se ol vota oli save vot long man we oli wantem wetaot presa o fraet long eniwan from. Vot i mas sikret, mo sistem i mas mekem i posibol blong faenemaot hao wan vota hemi vot. I no gat wan man we bae save fosem yu blong talem se yu vot long hu, sipos yu no wantem talem.

Blong wan eleksen i "fea", ol otoriti we oli ranem eleksen oli mas transparan, we i minim se i nogat samting i haed. Ol kandidat mo ol politikal pati bae oli save kompit long semak fasin wetem semak janis blong kampen. Bae i no mas gat eni distebens wetem ol balot boks, no pem vot o krukret fasin.

Kaonting blong ol vot i mas stret blong givim wan honer risal we ol ovarol wina mo lusa oli save akseptem.

Ol eleksen oli mas tekem ples oltaem blong mekem se ol ofisol we oli elektem oli save stap akaontebol oltaem long ol pipol. Sipos oli no mentenem ol responsibiliti blong olgeta long ol vota, bambae oli save lus long nekis eleksen.

Askem ol studen blong ridim seksen long saed blong ol fri mo fea eleksen insaed long Studen Wokbuk blong olgeta.

## “Universal Suffrage”

Askem long ol studen se long tingting blong olgeta, wanem nao mining blong toktok ia “Universal Suffrage”. Lisen long ansa blong sam studen.

### Talem ol toktok ia:

Universal Suffrage i minim se evri Sitisen, man, woman, yangfala mo olfala, hemia we i skul o i no skul, oli gat semak raet blong vot. Evriwan i gat raet blong vot, nomata long kala blong skin, jenda, langwis, mani we hemi mekem, propeti, karia, sosol standing, klas, edukesen, relijen, disabiliti o politikol konviksen.

### Wan man, Wan vot

“Wan man, wan vot” i minim se wanwan vot we oli kastem i semak. Hemia i ekskludum posibiliti, olsem eksampol, blong vot blong ol grup we oli gat hae salari we i karem moa vot bitim blong olgeta we oli no mekem tumas mani.

### Sikret balot

Long wan sikret balot, ol vota oli save kastem vot blong olgeta mo i nogat man bae save faenemaot hao oli vot. Hemia hemi impoten tumas blong mekem se pipol oli no stap anda long presa from wei we oli vot.

## Aktiviti: Yu stap long wanem saed?



Long wan open spes insaed long klasrum, putum wan saen long wan saed blong rum we i se “Agri fulwan” mo wan saen long narafala saed blong rum we i se “Disagri fulwan”. Makem midpoen bitwin tufala wol wetem wan string o wan selotep.

Askem ol studen blong stanap long midel blong rum. Eksplenem long olgeta se bae yu ridimaot sam stetmen mo yu wantem wanwan long olgeta i muv i go long wan spot insaed long rum we i ripresentem level blong agrimen o disagrimen blong olgeta. Letem olgeta i save se bambae yu save askem olgeta blong talem from wanem nao oli jusum ples ia we oli muv go long hem.

Ridim ol stetmen daon ia mo givim janis long ol studen blong jusum ol posisen blong olgeta. Askem sam lo ol studen blong eksplenem ol respons blong olgeta, mo alaowem wan opotuniti blong ol nara studen blong jenisim ol ples sipos ol ansa oli afektem ol desisen blong olgeta. Mekem sua se oli andastanem se i no gat ansa we i raet o i rong (from ol stetmen ia oli rilet long ol valiu blong olgeta), mo tekem taem blong tokraon long ol tingting mo ol opinion we oli kamap.

- Oli shud tekemaot raet blong vot long ol pipol we oli no vot.
- I no nid blong vot - nogat samting bae jenis.
- Gavman i no mekem eni samting blong mi.
- Vot blong mi bae no mekem eni difrens.
- Politik i no intresting.
- Man i westem taem nomo long politik.

Mekem samari wetem klas, haelaetem impotens blong vot, blong yu gat wan voes, kipim ol memba blong Palem, ol Provinsol Kaonsel mo ol Munisipaliti oli akaontebol, mo impruvum sosaeti.

# Ol Politikol Kampen

## Talem ol toktok ia:

Ol kandidat oli save stanap tru long wan politikol pati o olsem wan indipenden kandidat. Long evri eleksen, ol kandidat we bae oli stanap, bae oli oganaesem ol kampen. Hemia hemi taem oli pablisim ol tingting mo plan blong olgeta abaot wanem bae oli mekem sipos oli win long eleksen. Oli printim ol posta, ol brosa mo liflet blong seremaot long populesen mo holem ol pablik miting we oli singaotem olsem ol rali, mo ol pipol oli save kam mo lisen long wanem we oli proposem.

Long taem blong kampen, ol kandidat oli eksplenem wanem bae oli mekem blong pipol mo ol komuniti blong olgeta. Hemi impoten blong lisen gud mo no fraet blong askem ol kwesten. Yu luk se man ia i gat ol kwaliti blong wan gudfala lida? Sipos wan kandidat i ofarem mani o ol samting olsem kakae, drink, ekwipmen o sam narafala samting long eksjenj blong vot, hemia hemi no stret mo hemi wan elektrol ofens.



## Ol Woman olsem ol kandidat

Vanuatu hemi wan long ol kaontri long wol wetem wan reit we i lo tumas blong ol woman we oli elektem olgeta i go insaed long Palemen. Ol woman olsem ol man, oli patisipet plante long evri bigfala segmen blong sosaeti long ol politikol proses, mo hemi wan impoten samting blong wan strong demokrasi. Long lukluk blong aotsaed wol, pipol bae oli no trastem ol elektrol proses sipos oli no givim oportunity blong ful mo ikwol patisipesen blong ol woman. Ol yangfala gel insaed long klas ia oli nid blong stat tingbaot wanem nao bae oli save ofarem long kaontri samtaem afta long laef blong olgeta mo disaed sipos wan dei bae oli stanap long eleksen.

## Klas diskasen: Ol Woman insaed long politik

Askem: Yu ting se ol woman oli save kam ol politikol lida?

Talem long ol studen blong eksplenem from wanem oli agri o no agri. Long en blong diskasen, askem klas blong leftemap han sipos bae oli vot blong wan woman we i stanap olsem wan kandidat.



### Talem ol toktok ia:

Nomata se kandidat hemi wan woman o no, be impoten samting hemi blong man ia i honas, man i save trastem hem mo bae hemi save mekem wanem we hemi promes blong mekem.

### Raetem ol bigfala kwesten daon ia long bod

Tekem wanwan heding mo gaedem klas diskasen tru long ol kwesten blong askem long ol studen (luk sam ansa we oli putum long italics).

- **Wanem nao bae yu lukaotem long wan kandidat?**  
(Wanem ol kwaliti we oli impoten tumas long wan lida? Wanem nao ol samting we komuniti i nidim kwiktaem? Kandidet ia hemia gat eni eksperiens?)
- **Olsem wanem nao bae yu faenemaot ol infomesen abaot ol kandidat?**  
(Niuspepa, intanet, go long kampen ofis blong olgeta, askem pipol insaed long konstituensi we oli save hem, hem i pat long wan politikol pati? Wanem nao pati ia hemi ripresentem?)
- **Wanem ol materiel we bae givim yu moa infomesen abaot ol kandidat?**  
(Niuspepa, intanet, go long kampen ofis blong olgeta, askem manifesto blong kandidat, askem CV blong olgeta.)
- **Olsem wanem nao bae yu save abaot ol lidasip abiliti blong kandidat?**  
(Oli bin elektem hem bifo? Wanem past eksperiens blong lidasip nao oli gat? Oli save olgeta olsem wan lida insaed long komuniti? Wanem nao oli bin mekem blong komuniti?)
- **Olsem wanem nao bae yu faenemaot ol tingting blong ol narafala pipol abaot wan kandidat?**  
(Askem ol kwesten long ol pipol insaed long komuniti, famil mo ol fren.)

### Rimemba!

Hemi responsibiliti blong yu blong faenemaot, blong yu wan, wanem we yu nid blong save blong mekem desisen blong yu. No dipen nomo long wanem we pipol oli talem.

Nogat man i gat raet blong fosem yu blong jusum o vot long eni man (mo hemi wan sikret balot, mo nogat man i save faenemaot se yu vot long hu ia). I no nid blong talemaot hu ia man we yu vot long hem o jusum sipos yu no wantem talem.

I no nid blong vot long ol famili o fren. Mo yu no nid blong vot long semak kandidat olsem famili o fren blong yu. Hemia hemi joes blong yu mo hemi stap long yu blong disaed se hu nao yu ting se bae kam wan gudfala lida.



### Homwok:

Talem long ol studen blong raetem ol trifala kwesten daon ia insaed long eksekses buk blong olgeta. Talem long olgeta blong raetem wan diteil ansa blong wanwan kwesten. Wanwan ansa i shud wan paragraf.

1. Wanem tingting bihaen/wok blong ol eleksen insaed long wan demokrasi?
2. Wanem tingting bihaen/wok blong ol representativ insaed long wan demokrasi?
3. Olsem wanem nao bae yu save jusum gud kandidat blong vot long hem long wan eleksen?





# Lesen 11: Inkludum evriwan insaed long wan Demokrasi

## Wanem we bae yu lanem afta long lesen ia:

Bildimap save long saed blong daevesiti long Vanuatu, mo ol grup we oli nogat tumas opotuniti blong mekem samting insaed long sosaeti, mo oli faenem i had blong aksesem ol politikol mo elektorol raet.

## Ol mein toktok/tingting:

Inklusen/eksklusen, ikwoliti/inikwoliti, daevesiti, diskriminesen, universal suffrage, disabiliti, Convention on the Rights of Persons with Disabilities (CPRD)

## Ol Tingting blong statem seksen ia:

Ten-Minit Jalenj



## Aktiviti blong Stat wetem: Ten-Minit Jalenj

Talem long ol studen oli mas mekem raeting ekasesae ia kwaet nomo, mo bae oli no nid blong sherem wanem we oli raetem wetem eniwan sipos oli no wantem.

### Talem long ol studen se oli gat ten minit blong raet bes long tu (2) memori:

1. Tingbaot wan taem long skul taem yu bin filim se oli inkludum yu (yu pat long wan samting, oli apresietem yu, mo oli valiu yu) mo
2. Tingbaot wan taem we yu filim se oli no inkludum yu, yu filim olsem yu yu wan nomo mo yu no gat valiu.

Askem sam voluntia blong tokbaot tufala memori blong olgeta. Olsem wan klas, yufala i diskasem kwesten ia: Wanem nao i mekem se ol studen oli filim se oli pat long wan samting o oli inkludum olgeta? Wanem nao i mekem se ol studen oli filim se oli no pat long wan samting o oli ekskludum olgeta?

Askem olgeta blong tingting long ol samting we oli semak mo difren insaed long ol stori blong olgeta.

Fasilitetem wan diskasen, lisen long ol samting we oli semak mo hemia we oli difren insaed long ol stori. Afta tokbaot konsep blong diskriminesen. Askem ol studen se wanem nao mining blong diskriminesen?

### Talem ol toktok ia:

Diskriminesen hemi fasin blong mekem distinksen bitwin ol man bes long grup, klas, o ol narafala kategori we oli kamaot long hem o man i tingse oli fit long hem. Pipol oli diskriminet bes long kala blong skin, jenda, disabiliti, ej, relijen mo sam narafala samting bakegen.

I gat eni long ol memori blong yu i bes long diskriminesen? Eksplenem gud ol toktok ia 'inclusion' mo 'exclusion'.

## Aktiviti: Givim definisen blong sam toktok

Meksua se buk blong ol studen oli klos. Raetem ol toktok ia long bod:

**'Equality';**  
**'Social Inclusion';**  
**'Social Exclusion'.**

Go tru long wanwan long olgeta mo askem ol studen blong givim wan definisen. Gaedem ol studen tru long ol ansa, afta ridimaot ol definisen we ol istap long neks pej ia.

## Ikwoliti


hemi long saed blong mekem sua se evri man i gat ikwol opotuniti blong mekyus long ol talent blong olgeta. Mo tu hemi wan bilif se i nogat wan man i shud liv wan laef we i pua tumas folem hao hemi bon, wea ples hemi kam long hem, wanem we hemi biliv long hem, o sipos hemi gat wan disabiliti.

## Sosol Inklusen

hemi abaot pipol - speseli ol pipol we oli no gat tumas privilej - blong save pat long sosaeti, tru long ol opotuniti, akses long ol risos mo rispek blong ol raet. Wan sosaeti we oli inkludum evriwan insaed long hem hemi wan we evri pipol oli filim se oli gat valiu, man i rispektem ol difrens blong olgeta mo oli mitim ol besik nid blong olgeta blong mekem se oli save liv gud.

## Sosol Eksklusen

hemi wan fom blong diskriminesen. Hemi tekem ples taem pipol oli no pat long ekonomik, sosol mo politikol laef blong komuniti blong olgeta, bes long sam sosol klas o kategori we oli pat long hem long saed blong kala blong skin, relijen, ej, jenda, disabiliti etc.



## Aktiviti: Diskriminesen

### Step 1:

Askem ol studen blong brenstom long ol stamba tingting from wanem pipol oli stap diskriminet. Raetem long bod, long wan konsep map, raon long toktok ia "diskriminesen". Taem klas i no moa gat samting blong talem, go tru long list ia, mo adem eni kategori we i no stap long list ia: ej, jenda, komuniti, kriminol rikod, longfala, hevi, disabiliti, nasonaliti, maritol stetes, res, relijen, ples we oli stap long hem, sosol klas, pesonaliti, mo eni narafala kategori.

### Step 2:

Givim wan smol ovaviu long diskriminesen mo/o fasin blong tritim wan man olsem se hemi no impoten long Vanuatu sosaeti.

### Talem ol toktok ia:

Diskriminesen i afektem ol opotuniti blong pipol, welfea blong olgeta, mo hao oli lukluk olgeta bakegen. Diskriminesen i stap yet olsem wan mein problem long wol tede. Samtaem ol loa, tradisen, ol polisi mo praktis we oli stap finis oli kosem diskriminesen. Ol sosaeti oli kontinu blong mekem ol distinksen bes long etnik grup, res, disabiliti, jenda mo ol narafala karakteristik we no shud gat eni impak long ol ajivmen blong ol man o long welfea blong olgeta.

### Step 3:

Askem ol studen: I gat eni grup long Vanuatu sosaeti we i mekem yu filim se oli ekskludum yu? Hu ia mo from wanem?

### Step 4:

Neks samting, askem ol studen blong tingting go bitim konteks blong Vanuatu, mo tingbaot ol narafala kaontri long wol. Askem olgeta blong brenstom ol grup ia truaot long wol we oli filim se oli no pat long hem, o filim se oli no impoten.

Traem mekem ol grup olsem: ol woman, ol pipol wetem disabiliti; pipol we oli liv o wok long ol rimot eria; ol maenoriti; ol refuji mo pipol we oli mov from ol naturol disasta mo olgeta we oli mov aot long wan ples i go long wan narafala ples; ol vota we oli stap long haos mo long hospitol; ol man we oli stap long kalabus; olgeta we oli no finisim gud skul blong olgeta; pipol we oli safa from siknes (olsem: COVID-19); ol yangfala mo ol olfala.

Mekem sua se ol studen oli andastanem ol toktok ia.

### Step 5:

Talem long ol studen oli luk "marginalised" grafik long pej 34 insaed long Studen Wokbuk blong olgeta.

## Step 6:

Neks wan, givim wan grup we oli potensoli majinalaes i go long 2 studen long wan grup, mo askem olgeta blong brenstom mo raet insaed long ol ekseases buk blong olgeta:

1. Hao nao grup ia hemi majinalaes o eksklud long sam aspek blong sosaeti?
2. Wanem nao ol baria we oli pipol ia oli save fesem blong aksesem ol politikol raet blong olgeta?

Givim samples 10 minit olsem blong oli brenstom, mo kamap wetem ol eksampol blong eksperiens blong olgeta o save blong olgeta. Go raon long klas mo givim ol tingting long eni grup we oli stap traem had blong tingting long ol ansa blong olgeta.

Taem aktiviti ia i finis, serem tingting blong wanwan grup long evriwan olsem wan klas.

## Step 7:

Raetem Kwesten 1 long left saed blong Bod, mo Kwesten 2 long raet saed blong Bod. Askem wanwan grup blong ridimaot ansa blong olgeta long tufala kwesten ia, samaraesem ol ansa long stret saed blong Bod.

Taem wanwan grup i ridimaot ol ansa blong olgeta, bae yu save harem ol ansa we oli semak. Taem i hapen olsem, yu jes putum wan tik nomo antap long semak ansa we i stap long bod finis. Long en blong hem taem evri grup i givim ansa finis, mekem wan jenerol diskasen long ol ansa we oli semak mo olgeta we oli difren.

Mekem i klia se plante grup oli listim "diskriminesen" long tugeta Kwesten 1 mo 2. Hemia i shud haelaetem hao i gat diskriminesen long sosaeti mo eksklusen blong samfala grup blong pipol we samtaem hemi bigfala jalenj we ol pipol ia oli fesem blong aksesem ol politikol raet blong olgeta.

Rimaendem ol studen se ol politikol raet hemi: raet blong joenem wan politikol pati; ran from ofis mo tekpat long wan politikol rali, mo sam moa.

## Step 8 :

Rimaendem ol studen se demokratik sosaeti hemi haelaetem stamba tingting se evri pipol oli ikwol. Ikwoliti i minim se evri man oli gat semak valiu, semak opotuniti, mo bae i no save diskriminetem man folem kala blong skin, relijen, kalja, jenda o disabiliti.

## Aktiviti: "Convention on the Rights of Persons with Disabilities"

Eksplenem long ol studen se naoia bae oli mekem wan aktiviti we bae luk hao ol man wetem ol disabiliti oli faenem i had samtaem blong aksesem politikol raet blong olgeta.

Givim wan sot samari blong "Convention on the Rights of Persons with Disabilities" (CPRD) – Konvensen long ol Raet blong ol Pipol wetem Disabiliti.

### Talem ol toktok ia:

CPRD hemi wan list blong ol raet we pipol wetem disabiliti oli gat. Konvensen ia i gat ol difren pat we oli singaotem ol Atikol. Be wanwan Atikol hemi tokbaot wan raet. Atikol 29 hemi abaot raet blong tekpat long politik. Atikol ia i talem se evri pipol wetem disabiliti oli gat semak raet blong tekpat long politik olsem ol narafala sitisen.

Hemia i minim se evriwan i shud sapotem ol pipol wetem disabiliti. Taem oli tekpat long politik, pipol wetem disabiliti oli save mekem sua se gavman i mekem ol loa mo desisen we i helpem olgeta tu. Raet blong vot mo stanap from eleksen hemi impoten tumas. Hemi givim pipol wetem disabiliti wan janis blong mekem ol impoten desisen. Hemi minim tu se pipol wetem disabiliti oli semak ol nara sitisen bifo long loa.

### Hemia definisen blong CPRD:

Ol pipol wetem disabiliti hemi inkludum olgeta we oli gat long-tem fisikal, mentol, intelektuol o sensori impeamen we taem oli interakt wetem ol difren baria, i mekem i had blong oli tekpat long sosaeti olsem ol narawan.

Vanuatu i saenem CRPD long 2007 mo hemi agri long hem long 2008. Gavman i mekem plante efot blong mekem sua se ol pipol wetem disabiliti oli save enjoyem fulwan, mo long wan ikwol besis wetem ol narafala man, evri human raet folem Konvensen ia. "National Disability Inclusive Development Policy 2018-2025" hemi pat blong ofisol plan blong Gavman. Oli priperem afta long wan konsaltesen raon long Vanuatu mo i riflektem ol kontribusen blong ol pipol wetem disabiliti.





### Talem ol toktok ia:

Gavman i mas enkarejem ol pipol wetem disabiliti blong tekem pat moa insaed long komuniti mo politik tru long:

- wei blong joenem ol oganaesesen blong ol pipol we oli intres long politik;
- wei blong mitim mo fomem ol oganaesese blong ol pipol wetem disabiliti.

Mekem wan klas diskasen long eni pipol wetem disabiliti we oli save we hemi aktiv long politik.

## Aktiviti: Eleksen we Pipol wetem disabiliti tu oli save aksesem

### Step 1:

Statem aktiviti ia wetem eksplenesen se wok blong vot mo kam wan kandidat long wan eleksen hemi 2 politikol raet we hemi impoten we ol pipol wetem ol diasabiliti tu oli shud aksesem.

### Talem ol toktok ia:

Olgeta otoriti blong eleksen oli mas mekem sua se evri vota we oli elijobol oli gat janis blong vot. Vot hemi shud isi mo evri man i save mekem, blong pipol i no nid blong go longwe tumas o mekem tumas samting blong save rejista mo kastem vot blong olgeta, nomata long wea ples oli stap long hem o wanem situesen oli fesem. Mo long semak fasin, hemi shud isi long olgeta blong stanap olsem wan kandidat.



CPRD i talem se evriwan i gat raet blong vot. Hemia i minim se pipol wetem disabiliti oli gat semak raet blong vot olsem ol narafala sitisen. Be, plante narafala kaontri, ol pipol we oli gat ol intelektuol disabiliti mo ol mentol helt problem oli no save vot.

### Step 2:

Mekem wan kwik brenstom long bod, mo askem kwesten mo ol ansa long: Wanem kaen disabiliti nao ol pipol i save gat?

Givim ol ansa olsem: no save lukluk gud; sorae i fas o no save harem gud samting; no save mov gud; intelektuol disabiliti (limit long abiliti blong wan man blong lanem samting) mo ol mentol helt kondisen (lusum hed), ol sik insaed long bodi (chronic illnesses), mo sam narawan bakegen.

Mekem sua se yu yusum wan stret langwis taem yu raetem ol toktok ia long bod, mekem sua tu se yu yusum wan langwis we i inkludum evriwan.

### Step 3 :

Givim wan disabiliti long 2 studen long wan grup. Askem olgeta blong brenstom long ol kaen jalenj we pipol wetem disabiliti oli save fesem taem:

1. oli go vot;
2. oli stanap olsem wan kandidat.

### Step 4:

Serem ol tingting ia we oli brenstom wetem, mo bakegen, poentemaot ol ansa we oli semak mo olgeta we oli difren, dipen long ol disabiliti.

Mekem samari blong ol tingting ia we oli kamap wetem long taem blong brenstom tru long wan diskasen abaot eleksen we evriman i save aksesem.

### Talem ol toktok ia:

Plante taem ol pipol wetem disabiliti oli faenem i had blong tekpat long ol eleksen. Olsem eksampol:

- I had blong kasem Poling Stesen mo go insaed sipos yu yusum wan wiljea;
- pipol wetem disabiliti oli no save abaot raet blong olgeta blong vot mo stanap long ol eleksen;
- hemi had blong andastanem ol infomesen abaot ol eleksen mo vot;
- pipol i nogat konfidens blong kam wan kandidat.

### Step 5:

Talem long ol studen blong ansarem kwesten ia insaed long eksesaes buk blong olgeta.

**"From wanem sam pipol wetem disabiliti oli faenem i had blong tekpat long ol eleksen?"**

## Step 6:

Naoia, talem long ol studen, long semak grup blong olgeta yet, blong brenstom long sam strateji we bae save adresem sam long ol jalenj we ol pipol wetem disabiliti ia oli save fesem.

## Step 7:

Serem ol tingting ia we oli brenstom wetem, mo bakegen, yu poentemaot ol ansa we oli semak mo olgeta we oli difren, dipen long disabiliti. Aknolejem ol studen from ol tingting blong olgeta ia, mo askem ol nara studen blong tingting tu long ol solusen taem yufala i go tru long ansa blong wanwan grup. Diskasem ol strateji blong mekem se pipol i save gat akses long ol eleksen.

### Talem ol toktok ia:

I gat plante wei blong givhan long ol pipol wetem disabiliti blong vot mo stanap olsem wan kandidat.

## Asistens long ol olfala man we oli liv wetem wan disabiliti

Vanuatu Elektrol ofis i gat wan polisi blong mekem se ol pipol wetem disabiliti oli gat wan prosija blong vot we i moa isi.

Presaeding Ofisa blong Poling Stesen mo ol narafala poling ofisa oli mas:

- mekem sua se pipol we oli nidim help (ol olfala, ol vota wetem disabiliti, woman we i gat bel o woman we i givim titi long pikinini mo ol papa mo mama wetem ol bebe) oli muv i go long foret blong laen;
- mekem sua se pipol i rispektem olgeta;
- Rimaendem ol vota wetem disabiliti long laen se oli save go wetem eni man we oli wantem sipos oli nidim help blong makem balot blong olgeta. Mekem i klia se wan man nomo i save givhan long saed ia.

## Ol Vota wetem disabiliti oli vot

Eni vota wetem wan fisikol disabiliti i save jusum wan man we oli wantem - we hemi wan vota we oli rejestarem - blong go wetem olgeta insaed long rum blong vot. Ol Poling Klak, ol ejen blong pati/kandidet mo ol obseva bae oli no alao blong givhan long wan vota, ekseps Presaeding Ofisa nomo we hemi mas vot folem tingting blong vota mo kipim vot i sikret.

Askem ol studen sipos oli save eni oganaesesen we oli wok blong sapotem ol Pipol wetem Disabiliti? Yu save talem olgeta ia:

- *Vanuatu Disability Promotion and Advocacy Association;*
- *Vanuatu Society for People with Disabilities;*
- *The Rainbow Disability Theatre (Wan Smolbag);*
- *Vanuatu Paralympic Committee.*



# Lesen 12: Fasin blong Vot

## Wanem we bae yu lanem afta long lesen ia:

Bildimap save long fasin blong vot, mo infomesen blong poling stesen

## Ol mein toktok/tingting:

Presaeding ofisa, poling klak, balot boks, balot

## Ol Tingting blong statem seksen ia:

Olgeta Politikol Pati long Vanuatu



# Vot hemi wanem?

## Talem ol toktok ia:

Yu neva vot bifo long wan ofisol eleksen. Hemia hemi wan bigfala step long laef blong yu taem yu kam wan adolt, wan bigfala man o woman. Taem yu kasem 18 yia, bambae yu save rejista olsem wan vota mo tekem pat long ol eleksen. Vot hemi wan impoten samting tumas we yu save mekem blong pat long laef blong kaontri. Sipos yu no vot, hemi olsem se yu stap kwaet nomo taem yu gat samting blong talem. Tingbaot se evriwan i gat raet blong jus tru long balot boks. Olsem wan yang vota, bambae voes blong yu hemi impoten blong fiuja blong kaontri.

## Aktiviti: Olgeta Politikol Pati long Vanuatu

Ol Politikol Pati hemi wanem?

## Talem ol toktok ia:

Yumi tokbaot ol politikol pati mo ol indipenden kandidet. Taem yu vot, yu fri blong jusum wan long tufala.

**Brenstom:** Askem ol studen blong givim nem blong evri politikol pati blong Vanuatu we oli save. Givim taem long ol studen blong oli tingting, mo raetem ol nem blong ol pati long bod.

Daon ia yu save luk list blong ol Politikol Pati we oli win mo go insaed long Palemen afta long Jenerol Eleksen blong yia 2019. Yu save hamas long olgeta?

- Union of Moderate Parties
- National United Party
- Green Confederation
- Rural Development Party
- Vanuatu Liberal Movement
- Vanuatu National Development Party
- People Unity Development Party
- Vanuatu Cultural Self-reliance Movement
- Vemarana
- Ngwasoanda Custom Movement
- Oceania Transformation Movement
- The People's Party
- Vanuatu Community Movement
- Friend Melanesian Party
- Kia Koe Party
- Vanuatu Progressive Development Party

## Talem ol toktok ia:

Vanuatu hemi wan smol kaontri be yumi gat plante politikol pati. Sam oli establisim gud, sam narawan oli no save stap longtaem. Oli kam tugeta from wan eleksen mo samtaem oli no moa stap afta sipos oli no winim eleksen. Sam pati oli joen tugeta wetem ol narawan blong fomem wan koalisen o wan alaens, we i save stap o i no save stap longtaem.

Sipos yu intres blong joenem o vot from wan politikol pati, lukluk long histri blong hem, mo lanem hao nao oli stap kam kasem naoia, mo hemi impoten blong luk se wanem nao oli stanap from. Ol politikol pati oli pablisim ol program mo ol plan o tingting blong oli wokem. Hemia oli kolek wan Manifesto o wan Polisi Platfom blong Politikol Pati. Ol indipenden kandidet tu oli pablisim ol plan blong olgeta blong karemaot sipos oli win.

## Jusum gud kandidet blong yu

Taem yu stap tingting long man we bae yu vot long hem, tingbaot olgeta samting we i mekem se wan man hemi wan gudfala lida. Yumi wantem ol lida blong yu we oli hones, oli wok had mo pipol i save trastem olgeta, mo oli no tekpat long korapsen. Yumi wantem se oli putum ol nid blong pipol feswan mo wok blong impruvum laef insaed long komuniti. Ol lida blong yumi oli shud kea abaot ol raet blong ol woman, pipol blong ol smosmol komuniti, ol maenoriti mo pipol wetem disabiliti. Ol lida blong yumi ol shud kea abaot edukesen, helt kea blong pipol mo emploimen opotuniti blong ol yangfala. Hemi impoten se kandidet we bae ripresentem yu, hemi kea abaot yut mo hemi wok tu blong lukaotem gud envaeromen long ol aelan mo vilej blong yumi.

Lisen long wanem ol politikol pati mo ol indipenden kandidet oli tokbaot mo wanem nao oli stanap from. Go mitim kandidet, askem kwesten, mo serem tingting blong yu.

Tingbaot blong soem rispek mo yu no mas fraet! Yu talemaot tingting blong yu long ol kandidet. Yu no ting se yu no soem fasin blong rispek, hemi raet blong yu ia. Hemi oraet sipos yu no agri be hemi no inaf blong lukluk daon long wanem we oli politisien oli stap mekem o no mekem. Yu mas kamap wetem ol gudfala tingting long hao nao ol samting oli save impruv mo askem sipos oli akseptem blong karemaot wok ia mo mekem ol samting ia i kam tru.

Ol yut oli save gat influens long ol politikol pati mo ol indipenden kandidet. Vot blong ol yut hemi impoten tumas long wan eleksen. No mas fogetem se vot blong yu hemi gat semak valiu olsem vot blong wan olfala man.



## Aktiviti: Diskasen

Sereaotem klas i go long grup blong 4 pipol. Askem olgeta blong tokraon blong 10 minit abaot tri (3) mein samting we oli ting se ol politisien oli shud mekem blong kaontri. Askem wanwan grup blong ripotem long klas mo putum samari blong olgeta long bod. Sipos wan tingting i kamaot tu taem, putum wan tik neks long tingting. Long en blong hem, raetem ol tingting we oli kamaot.

### Talem ol toktok ia:

Olsem we yu save luk, yufala olsem ol yang pipol yufala i gat ol gudfala tingting finis long wanem we kaontri ia i nidim. Traem faenemaot sipos ol politikol pati o independen pati oli serem ol semak tingting ia.

Askem: Hu i save nem blong MP blong konstituensi ia?

### Talem ol toktok ia:

Taem i kam long sesen blong Palemen, ol MP oli sidaon long Palemen Haos long Port Vila. Oli lukluk mo oli save proposem ol niu loa mo tokbaot ol isu insaed long Palemen. Hemia hemi inkludum tu ol kwesten we oli save askem ol Gavman Minista long saed blong ol isu we oli stap gohed naoia wetem olgeta we oli stap afektem ol lokal konstituen blong olgeta.

Ol MP oli seperetem taem blong olgeta bitwin wok long Palemen long Port Vila, mo wok long konstituensi we i elektem olgeta. Sipos oli memba blong wan politikol pati, bambae oli wok wetem pati blong tekem visen mo ol valiu blong pati ia i go fowod.

Sam MP blong ol gavaning pati (o ol pati) oli save kam ol gavman Minista wetem ol spesifik responsibiliti long samfala eria, olsem Helt o Edukesen. Oli no stop blong wok blong konstituensi blong olgeta mo, wanem wok we oli gat long Gavman o Palemen, bae oli mas kontinu blong holem ol miting oltaem wetem ol pipol long konstituensi blong olgeta blong lisen mo givhan long olgeta. Oli save askem wan kwesten blong wan Gavman Minista long bihaf blong pipol long komuniti blong olgeta mo haelaetem ol isu we we afektem bigwan ol lokal pipol.

**Hemi impoten tumas blong save hu ia hemi MP blong yu!**

# Hao blong yu vot long eleksen


## 1. Ko long Polling Stesen




## 2. Givim Nasonal Kad blong yu




## 3. Karem Balot pepa



## 4. Findem foto blong kandidat mo putum insaed long envelop



## 5. Putum vot blong yu long balot bokis



## 6. Sakem balot we yu no usum long plaes blong toti



## 7. Makem finga long ink mo karem bak Nasonal Kad blong yu



## Vot

Nomoli, i gat wan Polis Stesen long wanwan Poling Distrik, be long ol eria we populesen i bigwan tumas (olsem long ol ples raon long taon), i save gat moa long wan Poling Stesen long wan distrik. Plante taem ol Poling Stesen oli stap long ol skul mo ol komuniti senta, mo ol staf blong Vanuatu Elektrol Ofis nao oli manejem. Polis i provaedem sekuriti long ol ples we poling stesen i stap long hem.

## Aktiviti: Ol Step blong Vot – Dei blong Eleksen

### Talem ol toktok ia:

Ol dei blong vot oli tekem ples long ol ofisol dei blong wok nomo, i neva tekem ples long wan wiken. Long Vanuatu, Poling i tekem ples long wan dei nomo, stat long 7:30 long moning kasem 4:30 long aftanun. Namba blong ol vota long wanwan Poling stesen i difren. Long saed blong ol eleksen, kaontri, provins o munisipol oli seraot long ol konstituensi mo wanwan konstituensi oli seraotem olgeta bakegen long ol poling distrik.

Ol prosija blong vot oli semak blong ol nasonal, provinsol mo munisipol eleksen. Tingbaot se yu mas rejista bifo yu save vot long dei blong eleksen. Mekem sua se yu gat Nasonal Aedentifikesen Kad blong yu mo rejista taem yu kasem 18 yia. Taem yu rejista, bambae nem blong yu i kamaot long Vota Roll long Poling Stesen blong yu.

## Poling Stesen

Wan Poling Stesen hemi ples we pipol i go long hem blong vot. Jenerol rul hemi blong setemap wan poling stesen long wan poling distrik. Be, i gat sam distrik we oli gat moa long wan Poling Stesen, mo hemia i dipen long namba blong ol vota mo akses blong kasem poling stesen (hemia i stap hapen long ol ples we i gat bigfala namba blong populesen, espeseli ol ples long taon). Prinsipol Elektrol Ofisa (PEO) bae hemi pablim ol ples we ol Poling Stesen bae oli stap long hem bifo long eleksen. Insaed long kaontri, yumi gat samples 352 Poling Stesen.

Wan man i save vot long wan eleksen sipos:

1. nem blong hem i stap long rol blong ol elekta long Poling Stesen; mo
2. hem i soem Nasonal ID kad blong hem long Poling Stesen long dei blong vot.

Evri Poling Stesen i gat wan Ritening ("Presaeding") Ofisa we Rejistresen Ofisa nao i jusum. Rejistresen Ofisa bae jusum ol klak blong givhan long Ritening ("Presaeding") Ofisa.

**Askem ol studen blong leftemap han blong olgeta mo ansarem kwesten ia: Hu nao bae yu save faenem long wan Poling Stesen?**

**Ansa: 3 ofisol:**

- **Presaeding Ofisa:**  
Presaeding Ofisa (PO) hemi responsibol long ovarol manejen blong proses blong vot blong mekem sua se pipol i folem gud proses bifo taem blong poling, long taem blong poling mo afta long poling.
- **Poling klak 1:**  
hemi responsibol blong jekem Aedentiti blong ol vota mo givim ol balot pepa.
- **Poling klak 2:**  
hemi responsibol blong makem ink long finga blong man we i vot finis.

Ol nara pipol oli alao blong kam insaed long Poling Stesen long taem blong vot. be Vanuatu Elektrol Ofis i mas givim otoraesesen long olgeta mo oli mas stap nomo long ol ples we oli alao blong stap long hem. Oli no mas distebem proses o luk hu ia man we vota i vot from. Ol man ia hemi:

- Ol ejen blong ol politikal pati o blong ol kandidat we oli apruvum olgeta (oli werem wan baj blong VEO);
- Ol nasonal/intenasonal obseva we oli apruvum olgeta (oli werem wan baj blong VEO);
- Ol memba blong Media wetem ol valid press kad mo baj blong VEO;
- I gat ol Polis Ofisa tu we oli putum olgeta long Poling Stesen (plante taem long entrens be Presaeding Ofis i save alaowem olgeta blong kam insaed long Poling stesen olsem eksampol blong givhan long pipol wetem disabiliti);
- Ol ejen blong Kandidet mo ol obseva oli alao blong sidaon long ol ples we oli putum blong olgeta blong watjem proses mo mekem sua se evri samting i gohed folem stret fasin.


Vanuatu Elektrol Ofis (VEO) i gat wan polisi blong mekem prosija blong vot blong ol pipol wetem disabiliti long wan wei we i isi long olgeta. Eni vota wetem wan fisikol disabiliti bae save jusum wan man we hemi wantem blong givhan long hem – man ia hemi mas wan vota we oli rejistarem hem finis.

## Arenjmen blong Poling Stesen

### Wan Regula Poling Stesen


I gat tri (3) ofisol we oli manejen wan Poling Stesen:

- Presaeding (ritening) ofisa (PO)
- Tu (2) poling klak (2 poling klak i mekem wan jekpoen)



### Mega Poling Stesen

Long ol bigfala ("mega") Poling Stesen (plante taem long ol eria long taon), bae save gat plante jekpoen blong spidimap proses, mo tu wan man blong kontrolem laen blong mekem se ol vota oli folem gud proses blong vot kasem en.



Talem long ol studen oli luk ol step blong vot insaed long Studen Wokbuk blong olgeta, mo afta matjem ol step oa wetem stret namba.

1. Soem Nasonal ID kad blong yu long Poling Klak.
2. Poling Klak i lukaotem nem blong yu long list blong Voter Roll.
3. Taem Poling Klak i faenem nem blong yu mo i jekem aedentiti blong yu, bambae hemi tikim nem mo namba blong yu.
4. Poling Klak i givim wan balot pepa long yu.
5. Go long rum blong vot.
6. Lukluk gud balot pepa ia mo faenem man we yu wantem vot long hem.
7. Tikim nem blong kandidat we yu wantem vot long hem mo putum insaed long envelop mo kamaot long rum blong vot.
8. Soem long Poling Klak se yu gat wan balot nomo.
9. Putum balot blong yu insaed long balot boks.
10. Givim left han blong yu long Poling Klak blong hemi putum ink long bigfala fingga blong yu.
11. Tekem bak Nasonal ID kad blong yu.
12. Yu livim Poling Stesen.

### Vot blong yu hemi sikret

Nogat man bae save hu ia man we yu vot long hem mo i no nid blong talem long eniwan. Vot blong yu hemi sikret. Sipos wan man i mekem yu fraet o fosem yu blong talemaot hu ia man we yu vot long hem, yu ripotem hem long polis.

Tingbaot se hemi no stret blong akseptem mani o ol samting we i kam long wan kandidat we hemi givim long eksjenj long vot blong yu. Hemia hemi wan ofens mo bae yu save faen o kasem panismen.

I gat plante loa, rul mo regulesen raon long ol eleksen. Hemia oli impoten from yumi evriwan i wantem se eleksen hemi fri, i fea, transparan, man i save trastem mo i pisful. Hemi wok blong evriwan blong folem loa mo no mekem eni samting we i go agensem loa. Taem yu mekem wan samting we i no stret, oli singaotem se hemi wan Ofens mo i save mekem yu pem wan faen o go long kalabus.



# Lesen 13: Olgeta Eleksen Ofens mo Impotens blong Vot



### Wanem we bae yu lanem afta long lesen ia:

Save moa long ol rul long saed blong ol eleksen, ol eleksen ofens, impotens blong vot mo ol yangfala we oli tekpat long ol eleksen.

### Ol mein toktok/tingting:

Ofens, pem vot, fasin blong mekem man i fraet

### Ol Tingting blong statem seksen ia:

Raet o Rong?



## Aktiviti: Raet o Rong?

### Talem ol toktok ia:

I gat plante loa, rul mo regulesen raon long ol eleksen. Hemia oli impoten from yumi evriwan i wantem se eleksen hemi fri, i fea, transparan, man i save trastem mo i pisful. Hemi wok blong evriwan blong folem loa mo no mekem eni samting we i go agensem loa. Taem yu mekem wan samting we i no stret, oli singaotem se hemi wan Ofens mo i save mekem yu pem wan faen o go long kalabus.

Talem long ol studen oli openem eksesaes buk blong olgeta mo raetem namba 1 kasem 12 long wan kolon.

Afta talem long ol studen oli openem Studen Wokbuk mo luk ol stetmen 1 kasem 12. Givim 10 minit long olgeta blong disaed se stetmen ia oli raet o rong. Talem long olgeta oli raetem ol ansa blong olgeta insaed long eksesaes buk blong olgeta.

Taem 10 minit i pas, ridimaot wanwan stetmen. Askem ol studen blong leftemap han sipos ansa blong olgeta hemi "raet". Askem wan o tu studen blong eksplenem ansa blong olgeta. Afta yu givim stret ansa mo eksplenem long kolon hemia long raet saed blong tebol we i stap daon ia. Talem long olgeta blong oli putum wan tik neks long ansa blong olgeta sipos ansa hemi stret o wan kros sipos ansa hemi rong. Long en blong hem, talem long ol studen oli kaontem hamas stik o korek ansa we oli gat.

	Stetmen	Raet / Rong	Eksplenesen
1	Mi vot long Poling Stesen blong mi finis mi ron i go narasaed aelan mo mi vot bakegen long Poling Stesen blong fren blong mi. Mi glad tumas from mi save mekem 2 vot!	Rong	Taem yu vot moa long wan taem long semak eleksen, hemi wan series ofens. Bigfala rul hemi wan man, wan vot.
2	Mi save vot long eni Poling Stesen long distrik blong mi.	Rong	Yu save vot nomo long Poling Stesen we oli talem se bae yu vot long hem. Nem blong yu bae stap nomo long Vota Rol long Poling Stesen we yu go long hem blong vot. Meksua se yu jekem wea ples stret hemi stap long hem.
3	Fasin blong kiaman se yu wan nara man mo yusum Nasonal ID kad blong man ia blong vot hemi wan bigfala ofens.	Raet	Fasin blong mekem se yu wan nara man mo vot long ples blong hem hemi wan series ofens.
4	Vot blong mi i gat bigfala valiu: wan kandidat i givim 2000 Vatu long mi blong mi vot long hem!	Rong	Hemia oli singaotem "bribery". Karem mani olsem eksjenj blong vot long wan kandidat hemi wan kraem.

5	Fasin blong givim samting hemi pat blong kalja blong yumi. Mi save akseptem ol kakae, drink mo narafala samting we wan kandidat i givim, mo promes blong vot long hem nomata sipos mi no folem promes blong mi. Vot hemi sikret, bae hemi neva save!	Rong	Fasin blong akseptem ol trit o presen we wan kandidat i givim hemi wan fom blong braebri tu. Bae yu mo kandidat i save kasem panis from fasin ia.
6	Fridom blong toktok hemi raet blong mi. Mi save talem eniting abaot wan kandidat, nomata se hemi no tru.	Rong	Fridom blong ekspresen i no inkludum fasin blong kiaman o mekemap samting. Fasin blong spredem kiaman infomesen abaot wan kandidat hemi wan ofens.
7	Man bae kasem panis sipos hemi stopem wan elektrol ofisa blong mekem wok blong hem, nomata sipos ofisa i mekem wan samting we i rong.	Raet	Nogat man i shud kam insaed long ol wok blong ol Poling ofisol. Sipos yu luk wan poling staf i no mekem gud wok blong hem, ripotem long polis be yu no intafia long saed ia.
8	Fasin blong distroem o stilim ol balot pepa bae putum mi long bigfala trabol.	Raet	Balot pepa we yu save tajem hemi wan ia nomo we yu yusum blong vot. Intafia long ol balot pepa hemi wan series ofens.
9	Mi save tekem foto blong balot pepa blong mi mo sendem i go long ol fren o feveret kandidat blong mi blong soem vot blong mi long olgeta.	Rong	Vot hemi sikret. Hemi no alao blong tekem foto insaed long Poling Stesen. Hemi responsibiliti blong evriwan blong kipim vot i sikret.
10	Givim infomesen we i no tru long ol elektrol otoriti hemi wan kiaman mo hemi wan fasin we yu no shud mekem.	Raet	Infomesen we yu givim long ol elektrol otoriti olsem nem mo adres blong yu oli mas stret. Sipos no, bambae yu save faen o go long kot.
11	Olgeta eleksen ofisol nomo oli save handelem balot boks o/mo ol narafala eleksen materiel.	Raet	Olgeta eleksen ofisol nomo oli alao blong tajem o kam insaed wetem ol wok blong balot boks o eni narafala materiel blong eleksen. Taem we yu kam klosap long balot boks hemi wan taem ia nomo we yu go putum balot pepa blong yu tru long long slot antap long boks blong kastem vot blong yu. Bae yu no save tajem ol narafala elektrol materiel tu olsem vota rol mo tali pepa.
12	Sista blong mi i luk semak long mi. Mi save tekem ID kad blong hem mo vot long ples blong hem. Hemi oraet nomo from mifala i famili.	Rong	Hemia hemi fasin blong priten se yu wan narafala man (Impersonation) mo hemi wan ofens. Yu save vot blong yu wan nomo. Taem we yu save vot blong narafala man, hemi taem man ia hemi sik o i no save mov. Be man ia i mas fulumap wan fom bifo dei blgon eleksen mo VEO bae apruvum. Yu save karem fom ia i kam wetem yu mo vot long bihaf hem. Sistem ia oli singaotem "Proksi vot".



### Wanem nao ol mein elektrol ofens?

1. Vot plante taem.
2. Vot long wan ples we hemi no Poling stesen blong yu.
3. Kiaman se yu wan nara man mo vot long ples blong hem.
4. Bribery: risivim mane long wan kandidat mo promes blong vot long hem.
5. Treating: akseptem ol kakae, drink o eni samting olsem eksjenj blong vot long wan kandidat.
6. Mekem ol kiaman toktok abaot ol kandidat.
7. stopem wan ofisa blong mekem wok blong hem.
8. Destroem o stilim ol balot pepa.
9. Mekem se vot hemi no moa wan sikret.
10. Givim kiaman infomesen long ol elektrol otoriti.
11. Kam insaed o distebem balot boks o eni narafala material blong eleksen.

### Talem ol toktok ia:

Ol eleksen ofens oli series tumas. Yu save faen o yu save pas long kot o go long kalabus. Fasin blong kiaman o brekem rul long taem blong eleksen hemi spolem proses mo pipol bae no save trastem risal blong vot. Hemia hemi no gud blong demokrasi blong kaontri ia. Yumi mas mekem sua se eleksen i fea mo man i save trastem.

Hemi raet blong wan sitisen blong ripotem eni elektrol ofens. Sabmitim wan kes tru long nomol kot, insaed long period blong 21 dei stat long dei we ofens i tekem ples.

Hemi raet blong eni kandidat o sitisen blong putum wan elektrol petisen blong jalenjem ol risal blong eleksen. Ol elektrol petisen ia oli mas presentem insaed long wan period blong 21 dei blong pablikesen insaed long Ofisol Gazette blong ol risal blong eleksen. Suprim Kot nao i lukluk long ol petisen.



### Vot blong mi Voes blong mi

#### Talem ol toktok ia:

Pipol i vot from ol difren risen: plante oli vot from se hemi wan raet mo wan responsibiliti mo oli wantem luk jenis mo impruvmen insaed long komuniti blong olgeta. Olgeta narawan oli no vot from se yumi westem taem nomo. Be evri vot i kaont. Namba blong pipol we i stap go antap long evri eleksen i minim se i gat representesen we i moa gud, mo wan kwaliti blong laef we i moa gud blong evriwan. Taem yu vot, yu stap jusum ol polisi mo pipol we yu biliv se oli serem semak intres olsem blong yu, mo intres blong komuniti mo nesen.

Talem long ol studen blong luk ilustresen "From wanem yumi vot?" long pej 45 insaed long Studen Wokbuk. Askem ol studen se wanem ol samting we woman ia i stap tingbaot. Givim taem long ol studen blong ekspresen olgeta long wanem we foto ia i minim long olgeta. Askem olgeta sipos i gat eni samting bakegen we i no stap long foto ia, sipos yes, wanem nao i no stap?

### From wanem yumi vot?






### Talem ol toktok ia:

Sipos yu intres long ol isu olsem protektem envaeromen, animol raet, helt kea, imigresen, yunivesiti, ol wok mo inkam taks - yu shud vot. Sipos kandidat we yu vot from i no mekem wok blong hem olsem we hemi talem, yu save jusum wan kandidat we yu ting se hemi save mekem i gud moa, long nekis eleksen.

### Aktiviti: Klas Dibet



Talem long ol studen se bae oli tekpat long wan dibet long topik ia:  
"Vot hemi wan samting we evriman i shud mekem".

### Preperesen :

Seraotem ol studen i go long 2 grup – "SAPOT" mo "AGENS".

1. Askem wan studen blong voluntia long stap olsem jeapesen blong dibet.
2. Splitim wanwan long tufala grup i go long 3 grup we i moa smol.
3. Ol smol grup oli toktok mo preperem ol toktok blong olgeta (tu minit blong toktok).
4. 3 memba blong grup blong "Sapot" mo "Agens" bae oli serem ol toktok blong olgeta.

Givim enaf taem blong ol studen oli toktok bitwin olgeta olsem wan grup mo preperem spij blong olgeta. Talem long ol studen blong planem ol toktok blong olgeta mo yusum: Dibet Planing Pepa insaed long Studen Wokbuk blong olgeta mo "ol Toktok blong Sapotem mo Agensem Kompalsori Vot" (luk long pej 96 mo 97).

### Introdaksen long Topik:

Kompalsori vot hemi kamaot long stamba tingting se patisipesen blong evriwan hemi wan impoten aspek blong demokrasi we man i no save negosietem - hemi wan sivik diuti (responsibiliti) mo hemi no wan raet nomo.

Plante demokratik gavman oli tekem vot long ol eleksen olsem wan raet blong sitisen. Sam oli biliv se patisipesen long ol eleksen hemi wan sivik responsibiliti tu blong wan sitisen. Samfala kaontri oli mekem vot i kompalsori tru long loa mo kasem poen we oli putum ol panismen olsem ol faen long ol pipol we oli no vot. Level blong kompalsori voting we oli enfosem hemi difren folem ol kaontri.

Samples 20 kaontri we vot hemi kompalsori: Argentina, Australia, Belgium, Brazil, Bolivia, Bulgaria, Costa Rica, Democratic Republic of Congo, Ecuador, Egypt, Greece, Gabon, Guatemala, Honduras, Lebanon, Libya, Luxemburg, Nauru, North Korea, Mexico, Panama, Peru, Singapore, Switzerland, Thailand, Uruguay.

### Dibet:

Tim we i SAPOTEM stetmen i talem se vot hemi wan samting we evriman i shud mekem. Tim we i AGENS bae talem se hemi no agri long stetmen ia.

Eksplenem se ol studen oli no nid blong pesonoli agri wetem stetmen ia blong toktok strong from.

Jeaman i manejem proses blong dibet, invaetem ol spika blong toktok long taem blong olgeta, mo jekem taem. Wanwan spika i gat 2 minit maksimam blong toktok.

Jeaman i jekem gud taem. Hemi givim saen taem spika i gat 10 seken nomo i stap. Afta long 2 minit, spika i finisim toktok blong hem mo hemi mas stop blong toktok.

Afta we tugeta saed i toktok, tugeta tim bae gat 2 minit blong pripea blong tok agensem nara tim mo mekem samari.

Feswan, bae AGENS tim i prisentem toktok blong olgeta mo SAPOT tim i prisentem 2 minit tok bak blong olgeta mo givim samari. Afta long hem, dibet i finis.



## Ol opinion blong tugeta saed

### SAPOT

- Fasin blong vot hemi wan neseleri pat blong ol diuti blong sitisensip, semak olsem diuti blong wan juri long kot, pem taks, mo edukesen we pipol i mas kasem.
- Palemen i tingting gud long “will of the electorate.”
- Gavman i mas konsidarem evri vota insaed long ol polisi mo manejen blong olgeta.
- Ol kandidat oli save tokbaot moa ol isu long ol kampen blong olgeta, insted blong enkarejem pipol blong vot nomo.
- Givim bigfala lejitemesi long gavman we oli elektem.
- Ol kandidat we oli winim ol sit oli winim moa vot blong pipol.
- Long ol kaontri we i gat smol tenaot nomo, ol kandidat oli save win wetem wan smol % blong total vot.
- Wan lo tenaot i mekem se i gat plante kwesten abaot lejitemesi blong ful politikol sistem: “Wan lida we oli elektem i gat wanem raet blong rul sipos plante pipol i no vot long hem?”
- Insaed long wan demokrasi we hemi blong pipol, evriwan i mas gat wan voes blong disaed long wan samting.
- Wetem tingting se evriman i shud vot, Australia i gat wan sivik patisipesen long wol we i moa hae (95% man i go vot), kompea long Tonga (67%) mo United States of America (57%) long US presidensol eleksen.
- Enkarejem bigfala patisipesen blong ol grup wetem lo patisipesen reit. Involuntari vot, pipol we oli pua mo oli no skul gud oli no stap vot, mo hemia i muvum politik tuwod olgeta we oli rij mo oli skul gud. Mo taem oli no vot, ol politisen oli no mekem polisi blong olgeta, mo hemia i adap long kaen ia we oli nogat tumas opotuniti blong save mekem samting.
- Wetem tingting se evriman i shud vot, ol kandidat oli mas luksave mo konsidarem ol nid.
- Tingting se evriman i shud vot inkrisim politikol edukesen blong pipol from oli givim moa atensen long politik sipos oli save se oli mas vot.
- Tingting se evriman i shud vot i no fosem wan man blong jus. Pipol i stil save putum wan waet balot pepa insaed long boks. Oli no fosem man blong vot long eniwan from we hemi sikret.
- Tingting se evriman i shud vot i mekem politik i moa responsif long pipol. Ol kandidat we oli no gat mani oli no nid blong spendem mani blong pusem ol vota oli kamaot mo vot.

### AGENS

- Ol sitisen oli gat raet blong jus blong vot o no vot.
- Hemi no demokratik blong fosem pipol blong vot mo hemi wan vaeolesen blong fridom.
- Demokratik lejitemesi blong ol gavman we oli elektem anda long kompalsori vot, i save gat kwesten sipos oli fosem olgeta blong vot.
- Kompalsori vot i ridusum lejitemesi blong ol MP we oli elektem olgeta from oli winim ol vot blong pipol we oli no intres mo no kasem gud infomesen, be from oli mas mekem.
- Hemi leftemap namba blong ol “donkey votes” (pipol i mas vot long eni kandidat folem loa be oli no tingting long ol kandidat we oli vot long olgeta).
- i save leftemap namba blong ol vot we i no valid (ol balot pepa we oli spolem o no makem gud vot).
- Ol vota long ol koantri we vot hemi kompalsori olsem se oli no politikoli eduketed (mo ating i nogat tumas) bitim ol vota long ol vota long ol koantri we vot hemi voluntari (olsem Australia vs. New Zealand).
- Kompalsori vot i fosem pipol blong vot long wan man nomata we oli no laekem eni long ol kandidat we oli stanap.
- Voluntari vot i no neserili givim feva long olgeta pipol we oli rij o skul gud. Long plante kaontri, pipol we oli pua mo no skul gud oli save oganaesem olgeta long bigfala namba mo sapotem ol kandidat we oli sapotem ol konsen blong olgeta.
- Taem vot hemi kompalsori i mekem politikol sistem i no responsif. Sipos oli mekem vot i kam voluntari, bae hemi shekem politikol sistem. Bae ol Pati mo ol kandidat oli trae had moa mo mekem moa efot blong winim tingting blong pipol abaot ol advantej blong ol polisi blong olgeta blong mekem ol man oli go vot.
- Hemi kostem plante mani blong manejen ol eleksen wetem ful adult populesen we oli vot (inkludum ol kost blong manejen ol faen blong ol non-vota).
- Hemi moa jip blong gat voluntari vot.

Afta we dibet i finis, askem ol studen blong leftemap han blong olgeta sipos oli sapotem kompalsori vot.

### Aktiviti: Finisim toktok ia “Bae mi vot from se:”

Askem ol studen blong spendem wan minit blong tingting mo komplitim sentens ia. Go raon long ful klasrum mo askem wanwan studen blong talem sentens blong olgeta.



# Eleksen blong Klas blong Yumi

## Sesen 1: Jusum kandidat, Jusum Poling Staf

### Wanem we bae yu lanem afta long lesen ia:

Moa save long tingting bihaen mo ol proses blong ol eleksen.

### Ol mein toktok/tingting:

Eleksen, vot, balot, kampen électorale



### Preperesen / Ol Materiel:

Wan Katen blong yusum olsem "balot boks"

Wan Katen we oli brokem blong yusum olsem voting skrin

List blong ol studen insaed long klas = "Vota Rol"

Botel blong ink o kala pen blong putum "ink" long fingga blong ol vota A3 pepa saes mo ol kala pen o peint (blong ol posta), Sam A4 saes pepa

Sam pepa saes blong A4 we oli katem olsem skwea blong mekem ol "balot," wetem plante skwea from i gat plante studen (katem plante ekstra)

Selotep



### Talem ol toktok ia:

Bambae yumi mekem wan voting ekksesoes blong yumi blong jusum tu (2) klas representativ, wan boe mo wan gel. Tingbaot se proses blong vot bae no semak gud olsem long wan ril eleksen, be ol tingting bihaen long hem oli semak. Long eleksen blong yumi, eniwan long klas ia i save stap olsem wan kandidat, be long ol ril eleksen, i gat ol rul long hao blong kam wan kandidat. Olsem eksampol, yu mas gat ova 25 yia blong stanap olsem wan kandidat blong kam wan Memba blong Plemen, yu mas gat ova 21 yia sipos yu wantem ran from Provinsol o Munisipol Kaonsel, mo yu mas rejista olsem wan vota. Pipol i no save kam wan kandidat sipos oli stap sevem sentens blong olgeta long kalabus, o oli no moa gat mani long bank, o oli gat eni kaon wetem gavman o wan gavman ejensi. Mo hemi impoten blong save tu se ol pablik seven oli no alao blong stanap long eleksen mo hemia i inkludum ol jaj mo majistret, ol memba blong polis fos, mo eniwan we hemi jeaman, vaes jeaman, sekretari o tresora blong Nasonal Kaonsel blong ol Jif, Distrik Kaonsel blong ol Jif, Aelan Kaonsel blong ol Jif mo Eria Kaonsel blong ol Jif. Bae yu intres tu blong save se ol memba blong tijing sevis tu oli no save stanap olsem ol kandidat. I gat wan wei nomo we bae oli save mekem sipos oli wantem stanap olsem wan kandidat, hemi blong oli risaen long wok blong olgeta long pablik sevis bifo eleksen.




# Arenjmen blong Poling Stesen

## Wan Regula Poling Stesen


I gat tri (3) ofisol we oli manejem wan Poling Stesen:

- Presaeding (ritening) ofisa (PO)
- Tu (2) poling klak (2 poling klak i mekem wan jekpoen)



## Mega Poling Stesen

Long ol bigfala ("mega") Poling Stesen (plante taem long ol eria long taon), bae save gat plante jekpoen blong spidimap proses, mo tu wan man blong kontrolem laen blong mekem se ol vota oli folem gud proses blong vot kasem en.



## Step 1: Jusum kandidat

### Talem ol toktok ia:

Olsem long wan eleksen, bae yumi gat plante kandidat blong wan sit. Hemia blong mekem sua se i gat wan ril kompetisen bitwin ol kandidat. I gat wan sit blong wan gel mo wan sit blong wan boe. So yumi nidim sam gel mo sam boe blong kam fowod mo stanap olsem ol kandidat. Long wan ril eleksen, i save gat eni namba blong ol kandidat be blong eleksen blong yumi, bae yumi gat 3 kandidat blong sit blong gel mo 3 blong narawan. Leftemap han blong yu sipos yu wantem stap olsem wan kandidat!

Mekem sua se yu gat 3 kandidat long tugeta saed. Sipos ol studen oli fraet, traem enkarejem olgeta, o sipos no yu jusum wan man blong mekemap namba. Taem yu gat ol trifala kandidat, putum wanwan long olgeta i sidaon long wan kona blong rum.

## Step 2: Jusum ol Kampen Maneja mo ol Kampen Helpa

### Talem ol toktok ia:

Wanwan kandidat bae nidim wan tim blong helpem olgeta. Long wan ril eleksen, ol kandidat oli gat wan tim blong ol helpa we oli oganaesem kampen blong kandidat. Hemia i minim se oli givhan long kandidat blong oganaesem hem wan, raetem ol tingting blong wanem bae oli mekem sipos oli winim wan sit (Manifesto), mekem ol posta mo ol liflet, oganaesem ol rali, raetem ol spij mo setemap ol media intaviu.

Kampen Maneja hemi hed blong tim mo hemi lukluk long ol wok mo responsibiliti blong ol tim memba mo helpem kandidat blong oganaesem hem. Putum han i go antap sipos yu wantem kam Kampen Maneja blong Kandidet 1 (talem nem blong Kandidet ia), blong Kandidet 2 (talem nem blong Kandidet ia) mo blong Kandidet 3 (talem nem blong kandidat ia).

Mekem sua se yu gat wanKampen maneja blong wanwan kandidat. Askem ol kampen maneja blong go sidaon wetem ol kandidat blong olgeta.

## Step 3: Jusum ol Kampen Helpa

### Talem ol toktok ia:

Blong wanwan kandidat ia, bae yumi nidim 2 memba bakegen blong kampen tim. Putum han i go antap sipos wantem stap long kampen tim blong kandidat 1 (talem nem blong kandidat ia), blong kandidat 2 (talem nem blong kandidat ia) mo blong kandidat 3 (talem nem blong kandidat ia).

Mekem sua se yu gat 3 tim memba evriwan blong wanwan kandidat. Talem long olgeta blong go sidaon wetem Kandidet, maneja mo helpa blong hem.

#### Talem ol toktok ia:

Naoia bae ol kandidat mo tim blong olgeta oli wok tugeta long ol kona blong olgeta blong priperem kampen blong kandidat. Hemia ol samting we oli nid blong mekem:

- Priperem kampen spij blong kandidat: raetem daon ol tingting blong wanem kandidat bae mekem sipos hemi win; listim ol kwaliti blong kandidat mo ol risen from wanem pipol i shud from hem. Spij ia bae kasem 3 minit so mekem sua se i no longfala tumas mo i no sot tumas.
- Disaenem wan posta blong kampen wetem wan slogan.

Givim taem we i stap long ol kandidat mo kampen tim blong olgeta blong finisim ol wok ia.

#### Step 4: Jusum ol Poling staf

Singaotem ol nara studen i go long nara en blong rum.

#### Talem ol toktok ia:

Naoia bae yumi jusum ol poling staf blong wok insaed long Poling Stesen. Yumi nidim 3 staf:

1. Presaeding Ofisa (lukluk long proses mo setup blong Poling Stesen)
2. Poling Klak 1 (Jekem aedentiti blong ol Vota)
3. Poling Klak 2 (givim ballot mo putum ink long fingga blong ol vota)

Hu i wantem wok long Poling Stesen?

Mekem sua se yu gat 3 voluntia wetem wan gel o moa. Eksplenem wok blong wanwan staf memba.

#### Step 5: Ol Grup

Muvum ol "Poling staf" mo ol nara studen i go long ol grup blong 3-4 pipol mo mekem oli wok long ol difren posta we i talem se "Mi vot from se".

Givimaot ol fotokopi blong leyaot daeagram blong Poling Stesen long ol "Poling staf" blong karem i go long haos mo stadi long hem.



# Eleksen blong Klas blong Yumi Sesen 2: Vot mo Kaontem Vot



#### Preperesen / Ol Materiel:

Priperem wan pepa blong rikodem ol namba blong skowetem ol nem blong ol kandidat long wan list, raetem ol nem andanit long narawan, folem oda blong alfabet blong yusum long taem blong kaontem vot.

Rimaendem ol studen se tede hemi dei blong vot mo eleksen ia hemi blong 2 representativ blong klasrum (wan boe mo wan gel).



## Step 1: Ol Kandidet oli pripea

Talem long olgeta se ol kandidat mo ol kampen helpa blong olgeta oli gat 30 minit blong faenalaesem Manifesto mo ol kampen spij blong olgeta. Invaetem ol kandidat blong go aotsaed mo praktisim ol spij blong olgeta wetem ol helpa blong olgeta blong ol narawan oli no harem.

## Step 2: Setemap Poling stesen

Talem long olgeta studen blong putumap ol posta blong olgeta blong "Mi vot from se" raon long rum. Rimaendem ol trifala "Staf" long ol wok blong olgeta:

### 1. Presaeding Ofisa

Hemi supavaesem proses mo setap blong Poling stesen, mo supavaesem kaonting blong vot.

### 2. Poling Klak 1

Aedentifikesen blong ol vota: hemi faenem nem blong vota long list blong ol nem blong ol studen, mo i putum wan tik long saed blong nem blong olgeta.

### 3. Poling Klak 2

Man blong givimaot balot pepa mo putum ink long fingga blong ol vota: hemi givim wan balot pepa long wanwan vota mo i makem bigfala fingga long left han blong olgeta afta we oli kastem vot blong olgeta insaed long balot boks.

Talem long 3 "staf" blong tekem lid blong muvum ol fenija raon mo setemap Poling Stesen wetem help blong ol nara studen (yusum daeagram). Karem ol jea blong ol kandidat mo sam kampen helpa blong sidaon olsem ol obseva insaed long Poling Stesen.

- Talem long sam studen oli mekem balot boks long ol katen we i stap (klosem saed saed mo mekem wan hol long top blong katem mo no blokem). Eksplenem se long wan ril eleksen, balot boks bae hemi transparan mo bae oli silim wetem ol sekuriti namba.
- Talem long sam narafala studen blong mekem wan voting skrin wetem wan narafala katen.
- Mekem sua se ol tebol mo jea blong ol poling 'staf' oli stap long stret ples blong olgeta mo voting skrin oli putum long wan wei we baksaed blong vota bae hemi agensem wol (blong blokem vot blong man). Mekem sua tu se i gat wan pen bihaen long voting skrin blong makem balot.
- Mekem sua se "Vota Rol" (list blong ol studen long klas) i stap long desk blong Poling Klak 1.
- Mekem sua se ol "balot" mo ink/pen oli stap long desk blong Poling Klak 2.

### Talem ol toktok ia:

Bae yumi vot i no longtaem. Eleksen ia i no semak gud long wan ril eleksen. Be long wan ril eleksen, bae oli redi long balot wetem ol nem blong ol kandidat we oli printim. Be blong naoia, bae yu risivim wan blank balot mo bae yu raetem nem blong kandidat we yu jusum long balot taem yu stap bihaen long voting skrin. Vot hemi sikret so mekem sua se yu yusum ol blok kapitol blong mekem se nogat man i save luksave raeting blong yu. Taem yu raetem nem blong kandidat finis we yu vot from, foldem balot ia i go long 4 bifo yu kamaot bihaen long voting skrin ia. Putum balot we yu foldem i go insaed long balot boks. Sipos yu mekem wan mistek taem yu stap makem balot, yu save askem wan niu wan long Poling Klak be yu mas givim bak fes balot we yu spolem ia. Taem yu finis vot, Poling Klak bae putum ink long bigfala fingga blong yu long left saed. Risen hemi blong mekem sua se pipol i kiaman mo traem blong vot bakegen. Sipos oli makem fingga blong yu, hemia i minim se yu vot finis mo bae yu no save vot bakegen.

Naoia bae yu harem wanem we wanwan kandidat oli gat blong talem. Be long wan ril eleksen, Kampen i stop 48 haa bifo dei blong poling. Hemia i givim taem long evriwan blong tingting. I no gat kampen long dei blong poling mo ol kandidat oli no alao blong putumap ol posta kolosap long poling stesen o givimaot ol liflet. Eleksen blong yumi i difren lelbet from bae yumi harem ol kandidat oli toktok bifo vot i tekem ples.

## Step 4: Ol Spij blong Kampen

Askem ol kampen helpa blong putumap posta blong ol kandidat long ples we evriwan i save luk. Invaetem wanwan kandidat i go long foret blong klas. Askem long Presaeding Ofisa blong hemi kipim taem mo mekem sua se nogat wan spij i bitim 3 minit. Givim wan saen long kandidat taem i gat 15 sekens i stap long klok long taem blong spij.

Wanwan kandidat i mekem spij blong hem.

## Step 5: Vot

### Talem ol toktok ia:

Tingbaot wanem we ol kandidat oli talem mo wanem nao i moa impoten long yu bifo yu mekemap maen blong yu long hu nao bae yu vot long hem.

Talem long Presaeding Ofisa, mo Poling Klak 1 mo 2 oli tekem ples blong olgeta. Askem evriwan blong stanap folem wan laen.

Afta talem long Presaeding Ofisa blong fesem evriwan, tanem balot boks apsaed daon mo soem long evriwan se hemi emti. Afta talem long hem blong silim lid long top blong boks, mo livim wan slit we pipol i save putum balot blong olgeta i go insaed long boks.

**Talem ol toktok ia:**

Ol Poling Staf oli alao blong vot. Olgeta nao oli vot feswan.

Tekem ol trifala "Staf" tru long proses. Presaeding Ofisa i vot feswan.

Aedentifikesen (PO studen i talem nem blong o soem wan ID kad sipos oli gat wan). Klak 1 i krosem aot nem.

Hem i muv i go long Klak 2 we i givimaot balot. Afta we hemi vot, Poling Klak 2 i putum ink long finga blong vota.

Presaeding Ofisa i go bihaen long skrin, i makem balot blong hem mo i kamaot i go kastem vot blong olgeta. Afta Presaeding Ofisa i tekem ples blong Klak 1 blong mekem se hemi save go vot. Afta we Klak 1 i vot, Presaeding Ofisa i tekem ples blong Klak 2 blong mekem se hemi save go vot. Afta long hem, Presaeding Ofisa i stanap long saed blong balot boks o i muv raon blong jekem se Klak 1 mo 2 oli folem ol prosija.

Afta long hem, askem ol kandidat mo helpa blong olgeta blong go vot.

**Talem ol toktok ia:**

Ol kandidat mo representativ blong olgeta oli alao blong stap long Poling Stesen blong obsevem proses blong vot. Oli mas sidaon long ples we oli putum blong olgeta. Tede, ol representativ blong kandidat oli ol kampen helpa. Long wan ril eleksen, oli representativ blong kandidat oli mas karem apruvol blong Vanuatu Elektrol Ofis mo werem apruvol baj blong olgeta oltaem.

Invaetem ol kandidat mo sam long ol helpa blong olgeta blong sidaon long ples blong ol obseva. Gohed wetem ol vot. Taem wan studen i vot, muvum hem i go bihaen long rum.

**Step 6: Kaontem vot****Talem ol toktok ia:**

Naoia we evriwan i vot, bae yumi kaontem ol vot mo luk hu ia olgeta oli win. Long wan eleksen, oli kaontem vot long Poling stesen stret afta we vot i finis. Long eleksen blong yumi, bae yumi evriwan i watjem mo luk hao oli kaontem vot. Long wan ril eleksen, ol vota oli no alao blong stap insaed long Poling Stesen afta we oli vot. Be ol obseva, ol representativ blong kandidat mo olgeta long media bae oli save stap blong witnesem kaonting.

Talem long Poling Klak 1 mo 2 blong kliarem tebol blong tufala mo muvum tufala i kam tugeta blong mekem wan bigfala tebol (yusum moa tebol sipos oli smol).

Talem long Poling Klak 1 i raetem ol nem blong kandidat long Bod folem oda blong alfabet, kopi tali pepa we yu priperem ia. Mekem sua se Poling Klak 2 i putum tali pepa ia long foret blong tufala.

Afta, askem long Presaeding Ofisa blong openem balot boks long foret blong evriwan mo kapsaetemaot evri balot long tebol. Mekem wan hip.

Poling Klak 1 i stap nomo long bod. Poling Klak 2 i sidaon i stap wetem tali pepa.

Talem long Presaeding Ofisa i pikimap wan balot pepa, openem mo ridimaot nem long balet pepa laod, mo soem long klas.

Talem long Klak 1 mo 2 blong mekem wan mak long saed blong nem blong kandidat long bod mo long tali pepa.

**Talem ol toktok ia:**

Evritaem we wan kandidat i gat wan vot, bae yumi putum balot i go long wan hip. I gat wan hip blong balot blong wanwan kandidat.

Livim proses ia i kontinu kasem taem we oli openem evri balot. Eni balot we oli spolem o no save ridim, oli shud putum i go wan saed.

**Long en blong proses, yu talem ol toktok ia:**

Yumi kaontem evri vot. Naoia, bambae Presaeding Ofisa blong yumi i jekem se namba blong ol vot blong wanwan kandidat i semak long bod mo long tali pepa. Yumi stap askem Presaeding Ofisa blong kaontem ol balot long wanwan hip blong mekem sua se yumi no mekem eni mistek.



Mekem sua se yumi putum ol balot long stret hip / pael. Givim taem long proses blong kontinu.

Askem Poling Klak 1 blong kaontem ol mak long bod, mo Poling Klak 2 blong kaontem ol mak long tali pepa. Wanwan long tufala i talemaot risal.

Oli kandidat wetem moa vot oli win.

**Talem ol toktok ia:**

Woman we hemi win hemi xxx mo man we hemi win hemi xxx. Mifala i wantem kongratuletem ol wina, mo tu olgeta we oli no win. Mifala i hapi se oli tekpat from fasin blong tekpat hemi wan impoten aspek long hao demokrasi i wok. I no evriwan i save win long wan eleksen, mo yumi mas akseptem ol risal long wan pisful wei.

Askem ol kandidat we oli win blong oli kam long foret mo givim smol toktok.

**NB: Sipos tu (2) kandidat tufala i gat semak namba blong vot, yu mas oganaesem nambatu raon wetem tufala kandidat ia we oli kontest. Mekem sua se i gat enaf blank balot pepa.**

**Talem ol toktok ia:**

Kandidet X mo Kandidet Y oli kasem semak namba blong ol vot. Bambae yumi vot bakegen be blong tufala kandidat ia nomo. Yu jusum wan long tufala nomo.

Lidim klas tru long ful proses bakegen. Fes samting, yu arenjem rum long bak bakegen i go long setap blong vot mo mekem nambatu raon blong vot.

Afta folem semak proses blong kaontem vot bakegen. Raetem ol nem blong tufala kandidat long bod mo mekem nambatu tali pepa.

Talemaot hu i win.





